


OKHALIHIWA AANA ¹

 . . . woona oreera wiiwa yeeyo, eyo ti yooreera. Ahe, okathi wothe ne ti, ntoko sihimaly'aka khalayi, "Kaahitteeliwa murima okathi wiireliw'aka, 'Nrowe mpaani mw'Apwiya.'" Kookupali wira Davidi aahihimya nuulumo nlo em meta emosa, "Nrowe mpaani mw'Apwiya." Nkinsuwela nipuro nikina nooreerexa okhala, ankhi nyuwo, ninvikana mpaani mw'Awpiya.

² Vano, ohiy'ula, hiyo nookhalana axipatthani kamosa-kamosa va akhanle a oGeorgia. Awo khino anrowa okhala yeettihaka ikaaro nuumala—nuumala olya ohiy'ula. Vano nto hiyo nnoo . . . Aмоса-amosa ankhuma ottaiwenexa, kinroromela wira munoorupa wenno. Nto ipa sirin'ahu ti soohuliwa wa nyuwo.

³ Vano nto Namararu ohiyu hiyo nnoothikela, nisomaka, nto nuumala, Apwiya yatthuna vale, Ettiminku enrwa em meta ekina.

⁴ Nto nuumala oChautauqua onipacerya mahiku yeettaka mathanu na mosa. Tivo nyuwo othene murina mahiku anyu oowiiithyuwa ootthokihawe-ene, hiyo ninwehererya okathi, muulupale wooreerexa oChautauqua. Ti weiwo kweekwe onkhalanak'ahu okathi wooreerexa. Kahi mittitthi suulupalexa, hiyo imaara sikina nnikhalana . . . Siniphierya ntoko . . . Kinoona wira vaamuweryaneya waahela-mo atthu ikonto muloko, vookhweya. Masi, imaara sinci-ene, eyaakha evinre kinoona wira naahikhalana oophiyaka ikonto thanu na piili, etthu ntoko siiso. Naari nipuro noosareywa, masi wookhala opuro woophiyeryaxa weemela. Ni ikhukulu awo yaawery'aya ohela vate vothe ne. Nto siiso ninniwehererya yeeyo.

⁵ Nto kinnitthapa owoona anci-ene w'axinn'ihu arumeyi mu. Nkinwerya nnakhala wuupuwela nsina nawe va, murummwa, Munna Humes mulopwana ni Munna Humes muthiyana, ti nyuwo mukilante vaava va, n'axinamwane, hiyo nootteeliwa murima okhala ni yaawo, murummwa. Akina aya, Munna Pat, Munna Daulton, ni, oh, anci-ene tu, Munna Beeler. Ni koomoona Munna Collins okathi vakhani ovinre paahi. Ni, oh, yaamukhala yoorika vakhani waaromola othene aya. Masi hiyo nootthapa vanci-ene okhala ni nyuwo mpaani mw'Apwiya ohiy'ula. Munn'ola muulupale oreera murima Neville okilante ottuli waka nno wira ovekele ni miyo okathi onrow'ahu wiixuttiha Masu. Charlie, kootthapa owoonani ni Munna Nellie muthiyana va ohiy'ula, anamwane. Ela ti . . . nto omwiixuttiha Bibilia imaara sinci-ene ti wootepa . . . Ayo, Munna Welch,

miyo paahi . . . kaamoophavelani, kinniwoonani mukilanthene-ene ottuli iwo vano.

⁶ Omwiixuttiha Bibilia imaara sinci-ene ti yoorika vakhani, vakhani, moosuwela, enikhala ntoko weetta muxeeluni yoopeepheya, hiyo nniihana siiso. Masi hiyo paahi ninooona wira khino, nipuro nla ni okathi ula, yaamukhala yooreera ntoko oruuha e—ekereja mpakha ele enuupuwel’aka, mpakha mwi—mwiiwelo woomalela, mwa mukhalelo, wa etthu hiyo nry’ahu mwa Kristu Yesu. Nto imaara sikina kinnuupuwela wira olaleya etthu yooreerexa, masi kookupali wira imaara sikina, Munna Beeler, wira wiixuttiha onnirowa ovikana eyo, eri ntoko . . . vanci-enexa wa ekereja.

Vano, olaleerya imaara sinci-ene onnimuvara natampi, omuruuha moolamuliwani ni Masu. Masi wiixuttiha ennimuhela mutthu voopuroni wawe wa etthu owo okhanly’awe. Nto hiyo khanikhanle ooweryaka okhalana waamini vooloka-vo mpakha nisuwele opuro ahu etthu ekhanly’ahu.

⁷ Vano, vaakhanle wira Estadu Unidu, wa elapo ela yooreera nno, yaamukiruma oRuusiya, ntoko namuhupi a elapo ela, orowa oRuusiya, vano vakhala wira awo anikiruma ni ikano sa makhulupale orowa oRuusiya, owerya wothene Estadu Unidu orin’awe onikhala ottuli waka. Nuulumo naka vekeekhai ninkhala nimosaru ntoko Estadu Unidu, vakhalaru wira kookupaliwa ntoko namuhupi.

⁸ Vano nto vakhala wira Muluku ooniruma wira nikhale anamihupi awe, owerya wothene ori Wirimu, yothene okhanle Muluku, Malaikha Awe othene ni owerya Wawe wothene onikhala ottuli wa moolumo ahu vakhalaru wira hiyo n’anamitthaka oorummwa voolikane-ene, orowa w’atthu. Muluku ohaana ottittimiha Masu, maana Owo olempe voottittimiheya, wira “Sothene sinrow’anyu otthukwa vathi va, Miyo kinootthukwa Wirimu. Sothene sinrow’anyu otaphula vathi va, Miyo kinootaphula Wirimu. Ni kinoovahani ihulelo sa Momweneni.” Oh, anatiri aalupale sana Owo aavanh’awe mukereja!

⁹ Nto miyo kiri, nuumala nihiku nlo . . . Anci-ene a nyuwo, woona waka, mwaari vaava voosis’ula wira mwiiwe ntoko kintthun’aka o, mwa enamun’aka voowiiyeviha, ni yookhweya, otaphulela yo—yoowoona koonaly’aka ya Wirimu.

¹⁰ Miyo nkaakhalakhala hata vakhani kitthunaka ohoverya etthu p’itthu mutthu otonko awe okihimeerya wira Muluku t’ahimeenrye. Kaamwaamini hata wira nkoonale muhina mwa Yoolempwa, nlelo kaamutthuna waamini nuulumo na munn’owo. Miyo—miyo khino kaamukhala sana ni Bibilia, masi nlelo kaamwaamini wira khino munn’owo oroohiwa oratteene mwa enamuna emosa, wira siiso owo otapanyeyiye-ene vakhani. Nto nlelo kaamwaamini wira owo—owo ti munn’aka.

¹¹ Nto yaakhanle-ene etthu enikiviha mmurimani mwaka, ni kinroromela wira khenkhalakhala ekhumaka mwa iyaakha sinrwa, wira nkinkhalakhala kiliyalaka etthu yaakhumelenle Ettiminku evinre voosiisu, ntoko esumana. Eyo yookiiriha etthu miyo erukunxale makhalelo aka. Miyo—miyo nkinoova. Miyo—miyo nkinoova okhwa hata vakhani. Okhwa khokhalanne woova nnakhala. Ni—ni khokhanle wa nyuwo vakhalaru wira munoosuwela sana pahi. Vano, khino vakhala wira . . . Mwaahaana okhalana musuwelelo wira musuwele, okhala wira khiivo enamuna y’oleeliherya. Khaniphwanyaneya moolumo, okhala wira khanikhanle mutisiyonaariyuni a Enkelesi, wala hata tisiyonaariyu mukina, okhala wira eri mwa Ehinimala; khokhanle nsana, khokhanle meelo, yothene ti naanaano. Ni kahi “Kinnoona sana,” ni ewoora emosa okhuma vano, “Nkiniisoona oratteene,” nto ewoora ekina, “woona sana tho.” Ti naanaano okathi wothene. Munnona? Khemmala nnakhala, murettele woovuwa paahi, etthu emosa.

¹² Ni iwe khinweryaneya okhala-wo etampi, khivaaweryaneya okhala-wo ehace, khivaaweryaneya okhala-wo eretta, khiva—khivaaweryaneya okhala-wo hat’etthu yaarowa ophwanya olimani iwe wa Wirimu. Nto vakhala wira kinoowerya okhalana mureerelo w’ohimya yeela, yoowo, khino ohirin’aka. Kaahikhalane, vano kinvekela wira Muluku akilevelele. Masi kakhhalana mureerelo ene, ni waari wira Muluku akitthuniherye okuxiwa wira koone etthu, kaarowa ohimya Erimu yoopacerya. Vano nto kinnaamini, mmosa mBiliani, iihaniwa, kookupali wira aari Paulo, aakuxiwe muroohoni mpakha Erimu ya neerar. Nto vakhala wira yaari yootittimiheya siisa Erimu yoopacerya, exeeni erina Erimu ile ya neerar? Khivanxankiha ahaawery’awe ohimya yeeyo mwa iyaakha muloko ni xexe! Owo ohimye wira khaasuwela sinto aari mw’erutthuni wala ahikhalanne erutthu. Ni murummwa ole muulupale, kahi otthuna okawana mu—mu—muteko awe, wala kahi weererya hiyo wiikhaliha etthu p’itthu ntoko owo aakhanly’awe, masi kinniwerya ohimya ni yoowo, nkisuwenle sinto waari mw’erutthuni mu wala ota w’erutthu. Etthu emosa paahi, yaari y’ekeekhaixa ntoko sinooweh’akani nyuwo.

¹³ Ni miyo kinniikohaka kweekwe wira vaakhanle wira kaamuvira nto khunoona neeku naamukhaani niveveleyaka, erooho, ni wira, “Vale onrowa munna mulopwana ni muthiyana, awo ti Charlie ni Nellie. Ole ti Munna mulopwana ni Munna muthiyana Spencer anrowa vale.” Eyo kweekwe yaanikixankiha. Maithe aka yakhalaru mukhapurini, emoraka, yinttaka, maaru aka yaahikhale-tho va wira yiiwe-tho, ni ephome aka yothene yathikelana vale nto khuttikittheliwa mirette, ni khukhala mmaasini wala vatthayani, owerya waka wuupuwela, irukuruku sa oramatta aka sothene sironwe-ene, vano kaarowa okhala-tho sayi woohikhala erooho yaarowa oveveleyaka? Nto eyo

yaanikuukhula. Moota enrow'aya okisivela wira, "Sayi, Munna Pat, oh, kootteeliwa murima owoonani! Sayi, Munna Neville, moota kaatthun'aka owoonani!" Masi kaanuupuwela, "Ahe, kaahikhalane etthu yo woona-no, hata eyano y'olavula-no, yinttale-ene, ery'ene etthaya, kaarowa owerya sayi wira, 'Sayi, Munna Pat,' 'Sayi, Munna Neville,' wala siiso, 'Sayi, Charlie?'"

¹⁴ Masi vano koosuwela wira ti yoovonyeya. Maana yoolempwa mwa Soolempwa, yeeyo enihimy'aka wira khevirikanne, "Okhala wira emp'ela ya vathi va yakurumuwa vale, nookhalana emosa ennilipelela," empa ekina erina maitho, maaru, iyano, owerya wuupuwela. "Emp'ela ya vathi va yakurumuwa vale!" Yookhalana erutthu kinwery'aka okwannya-no, kinwery'aka olavula.

¹⁵ Nto vano enookirweela mmuruni, naanaano va, wira Moise aahikha ni ekhapuri yookhikalihwa iyaakha imiya thanu na tthaaru, ni Eliseyo aahirowa Wirimu iyaakha imiya thanu khalayi, masi Omwaako w'Orukunuwa awo yaaphwanyawe elavulaka ni Yesu.

¹⁶ Samuweli vaamanly'awe okhwa sivinre-ene iyaakha soophiyaka tthaaru wala thanu, nto mukhwiri a wEntori khumwiihana, vano owo khupopheela vathi wiitho wawe, ni khwira, "Mookoototha, okhala wira nyuwo mwa Sawuli, yeenyu." Owo khwira, "Okhala wira kinniwoona amuluk!" Owo aari pakawu, moone. "Kinniwoona amuluku evenyaka."

¹⁷ Nto Sawuli khaawerya omoona nlelo, nto owo khwira, "Onlattana n'ani? Mukileeliherye."

Khwira, "Owo t'oyeva erutthu, ni ookhalana mukhumi vanikhatani wawe."

¹⁸ Khwira, "Owo ti Samuweli, profeta, mukiruuhele nno." Ni kintthuna wira nwehe wira Samuweli khiwaamupweteiye omutthu awe hata vakhani. Owo nlelo aari profeta, owo aahimuleela Sawuli oratteene etthu yaarowa okhumelela mmeeloni mwaya.

¹⁹ Vano, moone, okhwa khonnivukula voomalela okathi onin'ahu ni wiipulela ni wiikhupanyiha vamaahiye. Owo onrukunxa nipuro nahu n'okhala paahi. Owo onnikumiha nipuro nimosa nirowaka. . . Wunnuwa exeenii? Kakhalaru-tho ewoora emosa, kinookhala waavikana atthu anci-ene a iyaakha muloko ni thanu na mosa, kinookhala waavikana atthu anci-ene a iyaakha thanu. Wunnuwa kuhiyo hat'etthu. Hiyo niheliwe mu paahi mwaha w'etthu, wira niire etthu.

²⁰ Ahe, vano, anci-ene w'aximai ala ooreera wiitho akilante va, akina w'awo arina iyaakha miloko mithanu na mosa wala miloko mithanu na miili, yaamwiira, "Ahe, kinreni miyo, Munna Branham?" Muhaalela an'inyu. Muhiira ele yaatthuneya wira mwiire.

21 Khino Tiithi mutokweene okilanche va, aamwiira, “Ahe, miyo koolima imatta, kihiira *ela*. Miyo nkinalaleyeyeke.” Masi muhiira paahi ele Muluku oorummaaweni wira. Nookhala nipuro nanyu.

22 Kilavulaka ni tothoro mmosa mutokweene, nsana, mmosa w’axipatthani aka matothoro, axaapara, a iyaakha miloko mithanu na miraru n’itthu. Ni mwaatani awe ori vaava vakereja ohiy’ula, ni awo anikhala vakhani, ookattamiheya vakhani mwaha wa yoowo. Ni miyo kaahirowa omuthotola. Nto vapaceny’aka olavula ni yoowo, owo khutthapa, khukileela mwaha wa mukwaha w’orowa oxaya aatonko awe wira iyaakha sinci-ene oColorado, muttethe ene yoowo kinixay’aka-wo. Oowaarya paahi ni oolikana! Nto miyo khwira, “Tothoro, okathi xeeni mury’anyu nvaraka?”

23 Owo khwira, “Okathi mwiir’anyu mwaamwaka.” Nto siiso miyo khwira. . . “Nto imaara sinci-ene,” owo khwira, “miyo kinnivara, kikuxaka ekarinyo aka, kaanipweha mirupa saka vakhavaloni vaka. Kaanimukuxa napampa aka ni weetta.”

24 Nto miyo khwira, “Ayo, murowaka nviraka mukerekhere mwa muro, ewoora ya neili voosiisu, ni muthuko anyu, mutthunaka ophwanya empa vaavo mwanamwane aawereiw’awe mmirimani wala mai mmosa oniwereiwa mwaha w’oyara.”

“Ti yeeyo.”

25 Nto miyo khwira, “Moosuwela, tothoro, kookupali wira, epante ekina ya mukaano ola nno, eriyari ya okhwa ni ohikhwa, Muluku ookhalana opuro wa matothoro ooreera murima atokweene arumeenle siiso.”

26 Maithori maalupale khumora mmaithoni mwawe nto khupacerya wunla, khuvenxa matat’awe ootteettheya khwira, “Munna, kinroromela wira ti siiso.” Mulaponi mothene, Muluku onilamula munepa wa mutthu, etthu ery’awe.

27 Vano miyo khunvaha Yoolempw’ela yootteeliha murima. Imaara sinci-ene, eettaka mapuro ale ooriipela ni amarove ohiyu, atthunaka omukhaliherya mutthu, khino khonaakheleke hata esentavo emosa mwaha wa yeeyo, masi vaareera. Miyo khwira, “Yesu oohimya mwa Soolempwa, ‘Ooreeriwa t’ale oomoriwa ikharari, maana anoophwanya omoreliwa ikharari.” Nto eyo ekeekhaii.

28 Nto ohiy’ula nintthuna nikhalihe ekereja, mwa masomi ala mararu, Muluku atthuniherya vale, moota xeeni ni etthu xeeni y’oweha, ele ekhanly’ahu. Ninrowa opacerya ekapiitulu 1 ya Eliivuru y’epaphelo ya Paulo aalepenly’awe aEfeso. Ni ninrowa okuxa ikapiitulu tthaaru soopacerya mwa isomelo sahu tthaaru sintharelana, nitthunaka okuxa ekapiitulu emosa khula ohiyu, nawerya vale. Ohiy’ula, Namararu, ni Ettiminku enrwa voosiisu. aEfeso, ekapiitulu 1. Vano okathi onsom’ahu hoothe, kaatthuna

kihimye ela, wira Eliivuru ila y'aEfeso eneetta volikane-ene ni Yoxuwa a Waataana Wa Khalayi. aEfeso, Eliivuru y'aEfeso.

²⁹ Vano, muupuwele, yairaneya vale wira ninookhuma vakhani, mwa wiixuttiha wanyu, munilevelele paahi ni nvilele ni hiyo vakhani. Nihinatthi okhunla, nrowe ninvekele Yoowo wira anikhaliherye, nuuramihaka miru sahu.

³⁰ Pwiya, hiyo nnaattamela Yolempwa Anyu yoowaarya ni yooreerhiwa, yeeyo ekhanle yoolipaneyaxa ovikana erimu yothene ni vathi. Maana hiyo ninsoma Masu ala, aniihaniwa Bibilia, wira "Erimu n'ilapo ya vathi soopiili sinoomala, masi Masu Aka khanivonyeya." Vano, mwa okathi ula woottittimiheya onrwaaka vapulpitu va ohiy'ula, ohoolo wa othuma w'Ephome Anyu, oophenteya ala ni oosivela anikhwa amphwanyaneya va ohiy'ula, evaraka khula nrromelo mwaamukhaani awo anwery'aya, wira yiilipiherye Waarya iwe onttthuna orwa. Okhale woophiyerya, ohiy'ula, wira khula mulipa-oowaamini va oone nipuro nawe, ni atthu othene nlelo ahinarwe mopatthanani mu muulupale, yiilipihe mwaha w'Omwene, Pwiya, ni emane mukhora mpakha Namasuka ohule mukhora ene. Munivahe, Pwiya.

³¹ Hiyo ninsoma va vaavo Bibilia ola ohikhanly'awe ootaphuleliwa ni mutthu meekhaawe. Muluku, mukhoottiherye wira miyo murumeyi Anyu wala khula murumeyi mukina aamukhalakhala eereryaka ohela otaphulela waya Masu aneene. Munitthuniherye osoma Yaawo paahi ni waamini Yaawo, ntoko silempwaly'aya. Ni vanci-enexa hiyo amakhampusi a makoto, hiyo mapastore nihiku nlo ninrowa othukumana iwe Muttetthe owo woovuwa ni makoto makhaani, ni ninrowa weemela Ohoolo wa Pwiya Yesu ni nnoorowa wona nloko nle nirwaaka, na Paulo, ni na Petru, ni na Luka, ni Marku, ni Matewu, ni othene aya, ni owoona elamuliwaka iwe ni makhuru aya. Muluku, mukhiyave wira kiwerye ohela itthuvo imilyawu muloko ohoolo wa inawu Sanyu okathi onrwaaka kipuruleyaka voowiiyeviha ni kihele matat'aka munawoni Mwanyu sooreerexa, kiire, "Pwiya, awo t'Awinyu."

³² O Muluku, munisarihe vasya ni Eroho Anyu, n'uphenta Wanyu ni oreera Wanyu murima. Ni wira hiyo niwerye, ntoko mulipa-oolepa ohimmy'awe munsiponi iyaakha sinci-ene khalayi, "Mwaapwittipwitthi Ophenteya okhwiye, Ephome Anyu yooreerexa khenimala owerya waya, mpakha Ekereja yothene yoopoliwe ya Muluku woopowa wira ehitttheke-tho. Nto opacerya vaavo, mwaha wo waamini, kinnoona evuvelo ele nikhwatta Nanyu nookhwalala nivahaly'aya; ophenta w'ovuluxa t'onikhala mwah'aka, ni onookhala mpakha vankhw'aka. Vano mwa esipo ya nttittimiho, ni yoosivela," owo onttthikela ahimiyaka, "Miyo kinoorowa wiipa owerya Wanyu wo woopola; okathi nlu mi nla noohaawa, ni nookukuma ninkhal'aya noomala mukhapurini." Vano, ekhapuri khenaalipeleliha hata

okhwa An'Inyu. Nlo nipuro noomumula paahi, wala nipuro noowiipitha-vo, vaavo ela enintta enrow'aya owara ohintta.

³³ Wira ohiy'ula noone ela, Pwiya, voowooneya, okathi onivahiw'ahu muhina mwa Masu. Munivahe wiiwa oratteene. Ni munikhalihe, Pwiya, voopuroni vahu va muteko, wira nirumeele vooromeleya mpakha Nyuwo orwa. Hiyo ninvekela yeela mwa Nsina na Yesu, ni mwaha wa Yoowo. Amen.

³⁴ Vano, Eliivuru y'aEfeso, ntoko saahimy'aka paahi, miyo. . . mwa wuupuwela waka, ti emosa wa Iliivuru suulupalexsa sa Waataana Wa Naanaano. Eyo ennihiya, vatthu Calvinismu ommalel'awe okhomoni, ni Arminianismu ommalel'awe ekhomo ekina, masi Eliivuru y'aEfeso enootakanxa n'ukhaliha Ekereja voopuroni vaya.

³⁵ Vano, miyo kinlikanyiha ni Yoxuwa. Mwaweha vale, Isarayeli aakumihiwe wEjitu, ni siri ihuhu tthaaru sa mukwaha aya. Ehuhu emosa, waari okhuma wEjitu. Ehuhu yootharelana, waari mothakoni. Nto ehuhu yootharelana, waari oKanani.

³⁶ Vano, Kanani khonthoonyerya okathi w'oMileenyu. Owo onthoonyerya okathi wa mulipa-ooxintta paahi, okathi wo oxintta, okhala wira oKanani awo yaamwiiwa ni opattiha ni okuxa mittetthe. Nto khunrowa okhala okhwa oMileenyu.

³⁷ Masi etthu ekina eniir'aya, eniruuha okhalihiwa naxariya mwaha wo waamini, vaamanly'aya omwaamini Moise khikhuma wEjitu. Oreerihiwa, otthara ery'ene vathi va Nlumi na Mooro ni ottipiha itampi wa mwaapwittipwitthi a mukuttho mothakoni. Vano nto okela mmuttettheni yaavaheriw'aya natiri.

³⁸ Vano, muttetthe xeeni olaiheriwe mulipa-oowaamini a Waataana Wa Naanaano? Natiri ene ti Eroho Yowarya. "Maana enimwiiraneya wira mahiku ookiserya," Yoweli 2:28, "wira Miyo kinimwaamwaraxela Eroho Aka atthu othene. An'inyu alopwana n'athiyana anoolavula s'eprofeta. Nave-tho kinimwaavaha voomalela arumeyi Aka alopwana n'arumeyi Aka athiyana Eroho Aka, n'awo anoohimya s'eprofeta. Osulu wirimu kinimooniherya sootikiniha. Nave kinimooniherya elapo ya vathi, malumi a mooro, ni mwiixi, nnikupetthe." Nto Petru khwira, Nihiku na Pentekosite, vaamanly'awe okuxa yosoma awe ni olaleya, "Murukunxe murima, khula mmosa a nyuwo, mpatisiwe ni Nsina na Yesu Kristu wira muleveleliwe," ottipiha, olevelela, okumiha sootakhala sothene sivinre.

³⁹ Mooweha, wira Yoxuwa, awo ehinatthi omulapuwa Yordani, Yoxuwa iirale, "Murowe eriyari ya muttetthe mwakatthe ikuwo sanyu ni mwiireerihe khula mmosa a nyuwo, ni ohikhale hata mulopwana onimphierya mwaar'awe, maana muhina mwa mahiku mararu munimoona Ovuwa wa Muluku." Munnona? Eyo e—enamuna yoolikana wira nimwaakhele natiri. Vano, natiri a Isarayeli, aari, Muluku aahinvaha Abrahamu natiri o waakhela muttetthe, w'oPalestina, ni waari wira okhale

wawaya mahiku othene. Ni awo yaahaana okhala muttethe yoola mahiku othene.

⁴⁰ Vano, awo yaahivira ihuhu tthaaru, erwaaka muttethe yoola wa natiri. Vano nwehe, eyo ti yoolikanihiwa vekeekhai mwa Waataana Wa Naanaano.

⁴¹ Vano ela, ntoko sihimmy'aka, ennivirikana ni miyuupuwelo kamosa-kamosa sawinyu. Amosa-amosa wa nyuwo atthu aNasareno oophenteya, Ekereja ya Muluku, n'akina, muhihiye eyo woosikulihani, masi nwehe oratteene ni nwehe ilikanyiho saya. Nwehe moone sinto khula nipuro khaninlikana oratteene.

⁴² Saahikhala ihuhu tthaaru sa mukwaha, ni sookhala ihuhu tthaaru sa mukwah'ola. Maana, hiyo ninkhalihwiwa anaxariya mwaha wo waamini, nimwaaminiki Pwiya Yesu Kristu, nihiyaka muttethe wa wEjitu, nookhuma. Vano nto nnooreerihwiwa mwaha w'ovaheriwa Ephome Awe, orapihiwa itampi sahu, n'ukhala anawetta n'aletto, nihimyaka wira nimphavela muttethe, epooma enoorwa, ahiiso natiri.

⁴³ Ti siiso iiraly'awe Isarayeli mothakoni, aletto, ehirina hata nipuro n'omumula-vo, yeetaka ekwaha ohiyu p'uhiyu, ettharaka Nlumi na Mooro, masi wookiseryani khuphiya muttethe wa natiri weiwo yaakhanly'aya.

⁴⁴ Ti vaavo mulipa-oowaamini oniphyy'awe-vo. Owo ompacerya okupali wira natampii; vano onoovalaanyiwa ni maasi, orapihiwa ni maasi, ni Ephome, ni . . . wala orapihiwa ni maasi ni Masu, kiireke, omwaaminiki Pwiya Yesu Kristu. Vano, okhalihwiwaka naxariya mwaha wo waamini, onikhala oowiira mpantta, ni murettele ni Muluku, mwa Kristu, oopatisiwa mwa Nsina na Yesu Kristu, wira omukelihe mmukwahani. Munniiwa yeeyo? Mmukwahani! Vano owo onikhala muletto ni nawetta. Owo oneetta mukwah'awe arowelaka exeeni? Natiri Muluku omuhimmy'awe.

⁴⁵ Isarayeli iira ohimwaakhenle natiri ene, masi awo yaari mmukwahani mwaya. Ni ehivennye. . . Xontte mwiiwe sana. Ti vaavo nyuwo, aNasareno ni Anawetta a Osantu, n'akina, vamonry'anyu. Okhala wira, Isarayeli, okathi aphin'ye aya nipuro, na oKatexi-Parne, okathi alipa-oohottela yaaronw'aya khwira, "Muttethe owo muulupale." Masi akina aya khuhokolowa khwira, "Khaninwerya okuxa, okhala wira ipooma iyo ti sootekeleliwa n'ixiri, ni sikina." Masi Yoxuwa ni Kalebi khweemela, nto khwira, "Nootepa owerya okuxa owo!" Mwaha wa ihmeryo saya soolempwa ni soothittiwa, awo yaanaamini miteko miili sa mahala, okhalihwiwa naxariya ni oreerihwiwa, ni khiyaakhanle oorowaka-tho vattu. Ni, nwiriyanee, wira nloko nothene naahipweteya mothakoni. Masi aili yaaronwe muttethe wa natiri khuruuha iyooniheryo wira waari muttethe wooreera, "ni hiyo naari ootepexa okuxa, okhala wira aari natiri a Muluku." Vano atthu

ohiya okelela ohoolo, yaakhelaka Eroho Yowarya, elavulaka ilavulelo, yaakhelaka owerya wa Muluku, opatiiso wa Eroho Yowarya, ithoonyeryo, mitikiniho, miiriirya, awo yoonne wira yaamuhonona ilimalelo saya sa mwixuttiho. Nto exeeni yaakhumelenle? Yaahipweteya mmuttettheni! Ti yeeyo.

⁴⁶ Masi alipa-oowaamini, nikhuru na Kalebi ni Yoxuwa, yaamurowela natiri, awo yaahitthara ephiro aya erowaka mmuttettheni, nto khikuxa muttethe ene, khwiikhaliha mmuttettheni, ntoko wawaya. Ni hiyo khanneemela v'okhalihiwani naxariya, oreerihwa. Nitthikele nirowaka mpakha opatiiso wa Eroho Yowarya. Nrowe niheemele v'omwaamini Pwiya Yesu, nipatisiwaka. Nrowe niheemele okhala wira Owo oonirapiha makhalelo ale a etampi. Masi vano niilipiheke nrowaka mpakha vooপুরoni, mpakha natiri a opatiiso wa Eroho Yowarya. Maana Petru aahihimya, Nihiku na Pentekosite, "Okhala wira natiri t'awinyu, n'an'inyu, n'ale ari ottaiwene, othene ale Apwiya Muluku ahu antthun'aya owiihana."

⁴⁷ Vano, aEfeso va annikhaliha hiyo ntoko Yoxuwa, vooপুরoni. Nkawehani, Yoxuwa, vaamanly'awe olapuwela muttethe, n'ukuxa muttethe, vano owo aahikawa muttethe. "Efrayimi va, Manase va, ni ola va, Kati va, Peniyamini va." Owo aahikawa muttethe.

⁴⁸ Nto nwehe! Oh, eyo ennivihaha mirima sahu pahi! Khula mmosa a aximai ale aHeperi, yaayaraka aana ale, owo aanihimya nipuro nene, oonaka owereya wawe w'oyara, vatthu yaarow'aya okhalihwiwa-vo mmuttettheni wa natiri. Oh, eyo esomelo yuulupale! Vaakhanle wira naaniwerya paahi okela mwa yeeyo khuhimyxexa, yeeyo yaarowa okuxa iwoora iwoora sene. Nihiku nlo namalaru okhalana ekerej'ahu yoomale-ene, kaatthuna kirwe paahi kikuxe mweeri ntero wala miili, kikhale mwa yeeyo paahi. Nkawehani okathi awo, khula mmosa a aximai ale, okathi owo iihan'awe, "Efrayimi," okathi waayar'awe, aamukhalihwa vooপুরoni vawe vaavo inawu sawe saakhal'aya mwa pataroya. Vekeekhai khula mmosa a awo vatthu ti vatthu vaakhal'aya!

⁴⁹ Nto Yoxuwa, ahisuwelaka ela, masi ni muupululo, eettihiwaka ni Eroho Yowarya, nuumala okhala muttethe wa natiri, aahinvaha khula mmosa yaalaiheriw'awe, vekeekhai yeeyo Eroho Yowarya ehimmy'aya ottuli wu mwaha w'oyariwa.

⁵⁰ Moota Muluku aahenly'awe akina mukereja, mwa owereya w'oyara! Oh, awo anikhala oothukumela murima imaara sikina. Okathi ekereja eniipulel'aya mwaha w'olupatthiwa n'ulumwenku w'ota, emwaaminiki Pwiya Yesu, wira natiri a Eroho Yowarya t'ekeekhaixa wa hiyo ntoko aary'awe oPentekosite, moota awo aniipulel'aya ni wunla mwaha wa owereya w'oyara! Masi okathi aniyariw'aya, ni khukhalihwiwa

ooyariwa Momweneni mwa Muluku, vano Eroho Yowarya ehaahela mukereja, akina wira ekhale arummwa, akina maprofeta, akina awiixuttihi, akina amukukhula, akina anamlaleya ehapari. Vano Owo oovaha mpaani mmo, olavula ilavulelo, otaphulela ilavulelo, ankhili, osuwela, soovaha s'ovoniha, inamuna sothene sa miiriirya.

⁵¹ Vaavo ekereja ery'aya... Vano ela t'itthunelo aka yo wira ela. Ekereja okathi wothene eneererya okuxa nlotho na mutthu mukina. Masi muhiireke yeeyo. Khamunkhalakhala nweyaka omwaala nakhuwo vanlothoni va Efrayimi, mwaary'ene Manase. Muhaana okuxa opuro anyu mwa Kristu, mukuxe voopuro anyu. Oh, eyo enikela voowiixa ni voowaatta naakelaka mu, moota Muluku onimuhel'awe mmosa mukereja wira alavuleke ilavulelo, mukina... Vano, hiyo ninniixuttihiwa imaara sinci-ene, wira "hiyo othene nihaana olavula ilavulelo." Ti yoovonyeya. "Hiyo othene nihaana wira ela." Nnari, khanrina. Awo othene khayairasa etthu emosa. Khula mmosa aari . . .

⁵² Khula, muttethe waavahiwe ni waakaiwe ni muupululo. Ni, khula mmosa, kaamuwerya okuxa Soolempwa n'uwooniheryani oratteene, wira owo aakhaliha voopuroni vaatthuneya wira ekhale, voopuroni, moota nuusu piili sa mahimo yaary'aya wira ekhale epantte ekina ya muro, moota aximai aya yakhuwel'aya yeeyo moyarani mwaya, ni moota khula nipuro naatthuney'aya wira ekhale.

⁵³ Nto vano vammal'anyu okhala muhina, eyo khenihimya wira nyuwo mootaphuwa wira ekhotto. Nlelo muhaana owanela khula esentiimetru ya elapo munikhal'anyu. Tivo, moone, Kanani khaathoonyerya Erimu yuulupale, okhala wira yaari ekhotto ni mikattayamiho ni wiiva ni owana, ni sikina. Masi eyo yaathoonyerya ela, wira ohaana okhala weetta wooloka.

⁵⁴ Ti vaavo ekereja vanivony'aya olelo, moweettani memmo. Moosuwela wira hata mwiirelo anyu pooti okhottiherya mutthu ovonihiwa? Ohiira wanyu sana, wa itampi sohilampwa sa nyuwo alipa-oowaamini, sinniwerya wiiriha ekerej'ela ovonya vooriipiha-vo murima. Nto Nihiku n'Olamuliwa munimwaakhula mwaha wa khula emosa wa yeeyo. Oh, nyuwo muniira, "Vano, nwehererye minuutu mmosa, Munna Branham." Ahe, eyo Ekeekhai. Muupuwele yeeyo!

⁵⁵ Yoxuwa, vamanly'awe olapuwela muttethe, Muluku aahinvaha natiri wira . . . Muupuwele paahi, owana ekampaanya yothene ohipweteiye hata mutthu, ohikhalanne hata murahu, ehittuneyiye okhalana hata nfurumeera, wala mukhaliheryo woopacerya wala ekhulula. Amen. Muluku iirale, "Muttethe ti wawinyu, murowe mwawane." Muupuwele, owana ekampaanya, ni khokhanle Mwiikimanyo Wooxeerya nnakhala, khaavo mutthu onrowa ovulala!

56 Vano awo yaahiwiiva atthu a Amori ni aHiti, masi khaakhanle hata mmosa aavulanle eriyari aya mpakha etampi orwa vapuwani. Nto okathi Akani okunx'awe ekuwo ele y'oPapilooniya ephaara ele y'eweero, khuvitha vathi vapuwani vawe, vano mmeeloni mwaya awo yaahaapweteya alopwana muloko n'athanu na mosa. Yoxuwa khwira, "Mweemele! Mweemele! Nwehererye minuutu mmosa, yookhala etthu ehilonke! Yookhala etthu ehilonke va. Ninrowa orumiha mahiku mathanu na maili ootthuka. Muluku oonimanela natiri, 'Khenrowa okhala hat'etthu enrowa onivulaliha.' Awanan'ihu anoomorela munawoni mwahu. Nto yookhala etthu ehilonke va. Yookhala etthu evonyeiye nipuro nlo, 'okhala wira nookhalana alopwana muloko n'athanu na mosa akhwiiye yaataleleiyi va. Awo t'axinna aIsarayeli, vano ahookhwasa."

57 Awo akhwenleni, atthu oohittheka? Okhala wira mutthu mmosa aarookhuma mphironi. Munnoona mwaha wa xeeni entthuney'aya wiixuttihiwa yeela? Ekereja yiilokiheryaka, yiilokiheryaka ni Masu a Muluku, yiilokiheryaka ni Muluku ni yiilokiheryaka mmosa ni mukhw'awe, yeetaka oratteene vooweemela, voowiisinanela, ohoolo w'atthu othene, emoovaka Muluku. Okhala wira mutthu mmosa aarimwiiya ekuwo, ni khwiira etthu yahaatthuneya wira aire, yaahikuxa ekumi y'atthu muloko n'athanu na mosa! Kinoona wira yaari muloko n'athanu na mosa, khino oovikana. Kookupali wira yaari alopwana muloko n'athanu na mosa yaakhwiiye.

58 Yoxuwa khwiihana, khwira, "Yookhala etthu ehilonke! Muluku oommana natiri, nto yookhala etthu ehilonke."

59 Okathi onaaruuh'ahu aretta ohoolo wahu, khunavonya ovonihiwa, ennitthuna orumiha otthuka woottittimiheya, wiihana muthukumano. Yookhala etthu ehilonke nipuro nlo. Muluku oommana natiri, Muluku ohaana omulipiherya natiri uwo, ni Owo onimwiira.

60 Vano owo khirumiha otthukwa. Vano awo khuphwanya wira, awo khwaaxerya ehako. Vano Akani khuhimya. Vano awo khumwiiwasa Akani, amusi awe ni sothene, khupaha ittuurwa saya, eyo kuhala vaavale wira ekhale muupuxeryo. Nto Yoxuwa khutthikela arowaka okhottoni, akuxaka itthu sothene, voohivulala hata oxetteya. Eyo eri vo.

61 Nihiku nimoso owo aaniphavela okathi vakhani, okathi mukina. Nsuwa naamutupweela, axilopwana khiyaawerya owana oratteene okathi w'ohiyu. Yoxuwa, nakhott'ole muulupale, ooreerihwa a Muluku, ookhalihwa voopuroni vawe mmuttettheni, ntoko aEfeso wa Ekereja esya, anookuxa, aakuxa, anikuxa muttethe, exinttaka. Owo aaniphavela okathi vakhani, vano owo khwira, "Nsuwa, mweemele!" Vano nlo naaheemela iwoora soophiyaka muloko ni piili, mpakha owo okuxa muttethe. Munnona?

62 Vano Eliivuru y'aEfeso ennikhaliha voopuroni vahu mwa Kristu, yeeyo awo yaaris'aya Mmuttettheni Woowaarya. Hiyo ninkhalihiwa kahi Muttetthe Woowaarya, masi mwa Eroho Yowarya! Vano nrowe nisome Masu paahi, noone moota ekereja enlikan'aya.

Paulo, murummwa a Yesu Kristu vootthuna wa Muluku, . . .

63 Oh, okisivela eyo! Muluku t'omukhalinhe murummwa. Kahi ahumu yaamwiixathenrye matata owo, kahi mapixipu yaamurumme vatthu, masi Muluku t'amwiihanne khimukhaliha murummwa.

Paulo, murummwa a Yesu Kristu vootthuna wa Muluku, w'atthu ooreera murima (ale ooreerihwa) ni oororomeleya, mwa Yesu Kristu ari wEfeso:

64 Nkawehani moota owo oniveleelih'awe yeela. Ela kahi y'atthu oohaamini. Ela ti ya ekereja. Aniroiheliwa ale yiihaneliwe okhuma, ale ooreerihwa ni oowiihaniwa ari mwa Kristu Yesu.

65 Vano, mwaatthunaka osuwela moota onikel'ahu mwa Kristu Yesu, mwakhunlaru mwa aKorinto Oopacerya 12, ehimmye wira, "Okhala wira mwa Eroho emosaru hiyo othene noopatisiwa mw'Erutthu emosaru." Sayi? Oopatisiwa n'ixeeni? Eroho Yowarya. Kahi ni opatiiso wa maasi, nyuwo atthu a Ekereja ya Kristu, masi E-r-o-h-o iletera suulupale, mwa Eroho emosaru. Kahi ni ovahana mukhono, ni epaphelo, kahi omiseriwa omusaru. Masi mwa Eroho emosaru hiyo othene noopatisiwa mw'Erutthu emosaru, okuxa wahu, muttetthe Muluku onivahaly'awe wira nikhaleke-mo, Eroho Yowarya. Siiso ntoko Owo aavahaly'awe atthu a Isarayeli Kanani, Owo oonivaha hiyo Eroho Yowarya. Mwa Eroho emosaru hiyo othene noopatisiwa mw'Erutthu emosaru. Munniiwa?

66 Vano, owo onlavula n'aKanani a muroohoni, Isarayeli, Isarayeli a muroohoni ale akunxe muttetthe. Oh, khamuntteeliwa murima mwaha w'okhuma mw'ayuni a wEjitu? Khamuntteeliwa murima mwaha w'okhuma mothakoni? Nto, muupuwele, awo yaahaana olya emana, yolya ya Malaikha ya Wirimu, mpakha olapuwela muttetthe. Nto valapuwenly'aya muttetthe, emana yaahihya omora. Awo yaahittokothasa voomalela nto, ni yaalya muhokorokho wa mmuttettheni. Vano, vano muhikhanly'anyu-tho anamwane, vano muhintthun'anyu-tho eleethi ya xariya ya Ehapari yooreera, vahintthuney'aya weepesiwa, ni opapattheliwa, ni okhanyereriwa orwa okereja, vano mury'anyu aKristu oottokotha voomalela, moolikana wira mulye yolya yoolipa vano. Moolikana wira nvolowe muhina mw'etthu, owo oohimya. Mooliakana wira mwiiwe etthu eri yoowiixerya ni yoowaatta. Oh, hiyo nnookela mwa yeeyo naanaanoru. Nto, oh, yaahiipitihwa okhuma woopattuxiwani

w'olumwenku. Owo ohimnye wira, "Vano nvolonw'anyu mwa yeela, kinooruuhelani ila nyuwo." Kahi w'ale anammalaru okhuma wEjitu, kahi w'ale nlelo ari mmukwahani, masi w'ale ari muttethe wa natiri, amwaakhenle natiri.

⁶⁷ Akavi amwaakhenle natiri a Eroho Yowarya? Oh, khamuntteeliwa murima mury'anyu mmuttettheni nno vano, mulyaaka muhokorokho wa khalayi, mulyaaka ithu soolipa sa Muluku ni okhalana mwaiwelo oosuwanyeya. Mu—muupuwelo anyu wa erooho ori woohikhalana hata manyakunyaku. Munnimusuwela oratteene Owo ti pani. Munnimusuwela orateene Owo ti exeeni. Munnisuwela oratteene othu onrow'anyu. Munnisuwela oratteene yothene Eyo. Munnimusuwela Ole omwaaminni anyu ni mukupanly'anyu wira Owo onniwerya osuka ele nyuwo nvaherenry'anyu wa Yoowo ya nihiku. Oh, owo ti yoole, owo t'ule Paulo onlavulan'awe vano. Nwiriyanne oratteene. Vano nwehe.

...oororomeleya mwa Kristu Yesu:

⁶⁸ Vano, ekereja etthikele yeeyo. Hiyo ninkela sayi mwa Kristu? Mwaha wo wiitakanxa mukereja? Nnari. Mwaha w'ohela nsina nahu muliivuruni? Nnari. Mwaha w'opatisiwa nipwinihiwaka? Nnari. Ninkela sayi mwa Kristu? Ni Eroho Yowarya emosa hiyo noopatisiwa mwa natiri mmosa, Erutthu, ni niniira mpannta w'ale othene akhanle a muttethe. Amen! Oh, miyo—miyo okisivela eyo. Kahaalanle vammilo, kaamuwerya okhuwela. Wulu, okathi onikel'aka muttethe ola, ti wawaka. Kiri owaani vano; kiri oKanani. Miyo kinikhala oowiivahererya wa khula etthu Muluku ontthun'awe okirumeela. Kineetta muttethe woowaarya, mwaana a Mwene, oowarihiwa ni oolikana. Kookhuma wEjitu, khurwa kiviraka muttethe wa natiri, koovilela weereriwa, koomulapunya Yordani mpakha mutteth'ola wooreerihiwa. Oh, kiphwanye sayi? Mwa Eroho emosaru. Enamuna emosaru Paulo aaphwany'awe Yeeyo, evanre muteko mwa miyo ntoko Eyo yiiraly'aya mwa yoowo, enamuna emosaru Eyo yiiraly'aya mwa nyuwo. Mwa Eroho emosaru hiyo othene noopatisiwa. Kahi omiseriwa, omiserya vakhani paahi wa Yeeyo, woona oreera sana; masi opwinihiwa vathi! Othene okhalihwa oorapelela, muhina mwa Eroho Yowarya. Owo ti natiri ene.

⁶⁹ aEfeso ahu, Yoxuwa ahu, okhanle Eroho Yowarya, *Yoxuwa* enihimya "Yesu, Moopoli." Yoxuwa enihimya Eroho Yowarya ethoonyeryaka murohoni ntoko ele yaary'aya mw'erutthuni, wira Owo ti Nakhotto ahu muulupale. Owo ti Muhooleli ahu muulupale. Ntoko Muluku saary'awe ni Yoxuwa, siiso Muluku t'uryaawe (mwa Eroho Yowarya) eneettihaka. Nto okathi etampi enr'aya vapuwani, Eroho Yowarya envekela weemela, "Exeeni evonyeiye va mukereja mu? Yookhala etthu ehilonke." Oh, khamunwerya woona moota hiyo orin'ahu aana anci-ene a Kixi vano? maSawuli anci-ene anoorwa

73 Mwaakohe, “Muhaakhela Eroho Yowarya okhuma okathi mwaaminni anyu?”

74 Awo anookola maaru aya, ni khansuwela vatthu aniir’aya mpantta, “Munihimya exeenii? Ti vayi yothene *ela?* Munihimya exeeni, Eroho Yowarya? Nkinatoko wiiwa hat’etthu enihimya Yeeyo. Oh, siiso mukhanle-ene enamuna emosa ya namathipelela.” Moone, awo khansuwela t’ani aari paapa, wala t’ani aari maama, nnakhala. Nto muhaana waamana mwa sothene siniir’anyu, waamana *va* ni waamana *vale*, ni waamana *va* ni waamana *vale*. Ti yeeyo, muula wa khalayi.

75 Masi, kinimooleelani, khamurina yo wira yeeyo ni ekhavallo y’ekeekhai y’ephome yooloka. Weepettha paahi emaara emosa, nto munna, eyo yoorowa. Eyo ennisuwela eniir’aya. Oh, moota enreer’aya weettiha emosa ya ephome yooloka! Moota enreer’aya wira, “Nrowe, mmiravo.” Oh, mulopwana, vanreerela nvarelele sana, eyo enoorihela ekhukulu osulu.

76 Ti siiso ery’aya ni aKristu a ephome yooloka. Aleluya! “Mwaakhele Eroho Yowarya. Murukunxe murima, khula mmosa a nyuwo, mpatisiwe ni Nsina na Yesu Kristu, wira muleveleliwe itampi sanyu.” Anookhuma, vowaakuvaxa ntoko sinwery’aya erowaka mmaasini, aarowasa. Awo khanwerya omumula othana n’uhiyu mpakha yaakhele Eroho Yowarya. Mwaha wa xeeni? Moosuwela, muKristu onnisuwela t’ani yaari Apap’awe. Moone, anthuneya aili wira okhale oyariwa. Ti yeeyo, paapa ni maama. Muula khonsuwela t’ani aari paapa, wala t’uvi aari maama. Masi hiyo ninnisuwela T’ani aari Paapa ni Maama, okhala wira niyariwe ni Masu oolempwa a Muluku, oolipiheriwa ni Eroho. Petru aahihimya, Nihiku na Pentekosite, “Mwarukunxa murima khupatisiwa, khula mmosa a nyuwo, ni Nsina na Yesu Kristu, wira muleveleliwe itampi sanyu, munimwaakhela Eroho Yowarya.”

77 Nto, munna, muKristu eekeekhai ooyariwa vasya, (oh, wulu) erooho awe, omalakarwa waakhela Masu, owo onaakhela Eroho Yowarya. Mmukohe etthu nto! Owo onnisuwela veemenly’awe. “Munnaamini ovoniha wa Muluku?”

“Amen!”

“Munnaamini Orwa wa Neili?”

“Amen!”

78 Mmukohe muula yeeyo. Etiini ya muula, “Uh, nkinsuwela. Tothoro Jones aahihimya emaara emosa. . .” Huh! Vale, onrowa omuttharaka Sawuli. Munnona? “Oh, awo khansuwela. Ahe, kinimooleelani, ekerej’aka khenkupalixa Yeeyo.”

79 Oh, munna, masi mulopwana ni muthiyana ooyariwa vasya t’okupalixa orwa wa Pwiya Yesu, awo aakupalixa wira aakhalana Eroho Yowarya ntoko ekhanly’aya Eroho Yowarya wira evahiwe.

⁸⁰ Vano, Yesu iirale...Muthiyana veehimeni, “Hiyo ninkokhorela vamwaako va, nto aYuta ankokhorela oYerusalemu.”

⁸¹ Owo khwira, “Muthiyana, mwiiwe Masu Aka! Onimoorwa okathi, nto ti vano, okathi Atithi anaaphavel’aya ale anrowa waakokhorela Yaawo mw’Eroho ni mw’Ekeekhai.”

⁸² Masu Anyu ti Ekeekhai. Nto khula mutthu onrowa omusoma Bibilia ni waamini khula Masu Bibilia onihimy’awe, n’utthara sowiixuttiha Sawe, ni waakhela Eroho Yowarya emosaru awo yaakhelans’aya, enamuna emosaru awo yaakhelans’aya Eyo, sokhumiherya imosaru awo yaakhelans’aya Eyo, owerya omosaru awo yaarin’aya okathi yaakhenly’aya Yeeyo, owo onnisuwela t’ani aari Paapa ni Maama. Owo onnisuwela wira oorapihiwa mw’Ephome ya Yesu Kristu, ooyariwa ni Eroho, oosareya mureeriho wa Muluku. Owo onnisuwela veemenly’awe. Vekeekhai! Owo ori oKanani. Owo onnisuwela otthu okhummy’awe. Ti siiso ery’aya ni muKristu eekeekhai. Mmukohe, “Muhaakhela Eroho Yowarya okhuma okathi mwaaminni anyu?”

“Amen, munna!”

⁸³ Keemenle-ene nihiku nlo vakhiviru ni muthiyana mmosa ooreera murima mutokweene, a iyaakha miloko mithanu na mixexe ni piili, aalavula ni pastore awe a iyaakha miloko mithanu na miraru, miyo khwira, “Piipi?”

Oohakalala sana saaweryaney’awe okhala, owo khwira, “Ayo, mwan’aka.”

⁸⁴ Miyo khwira, “Okathi xeeni ovinre okhuma okathi mwaakhenly’anyu Eroho Yowarya?”

Owo khwira, “Avuwihwe Muluku! Soovira iyaakha soophiyaka miloko mithanu na mosa kaakhenly’aka Yeeyo.”

⁸⁵ Vano, vaakhanle wira aari muula, owo aarowa wira, “Vano, nwehererye minuutu mmosa, miyo kilipiheriwe ni kimiseriwe okathi waary’aka...Ahe, vekeekhai, nto khikuxiwa kirohiwaka mukereja nto khuroiha epaphelo aka wa *lexe*.” Oh, kimoreliwe ikharari! Awo hata khansuwela vaniir’aya mpantta.

⁸⁶ Masi owo onnisuwela onikhuma ehaakhi y’eyuulupale awe. Owo aari weiwo okathi yiireiye aya. Owo oyariwe ni maasi ni Eroho. Owo aanisuwela, ni maasi mwa orapihiwa ni maasi mwa Masu, antthuneya Masu.

⁸⁷ Vano nwehe moota eniruuhiw’aya ela, “W’ale ari mwa Kristu Yesu.” Paulo, vano, muupuwele...Kinikuxa okathi munci-ene, masi nkinrowa omaliha ekapiitulu ila. Masi kinimwaakuva...Ennoosivelani yeeyo? Oh, Eyo enninihimeerya vatthu vary’ahu, masi khaninwerya wira ohiyu umosa paahi. Sinnitthuna mweeri mmosa wala miili ya yeela, khula ohiyu, niviraka mwa Yeeyo paahi, Masu ni Masu. Otthikela ottuli n’uruuha mwa awahala,

Masu ni Masu, ni owoonihani wira Eyo ti Ekeekhai. Vano mukihye kisome-tho voowaakuva eversiikulu yeeyo.

Paulo, murummwa a Yesu Kristu voothuna wa Muluku (kahi otthuna wa mutthu), w'atthu ooreera murima ari wEfeso, ni (etakaniheryo) w'ale oororomeleya mwa Kristu Yesu:

⁸⁸ Enihimya, “Awo ahitthaniwa, aavalaanyiwa, nto vano aapatisiwa ni Eroho Yowarya, ni ari mwa Kristu Yesu. Kinooruuhelani epaphelo ela yeenyu, oophentiwa aka.” Oh! Kinimuupuwelela Paulo iwe ni yaawo naanaano va, oh, otthapa xeeni! Murummwa ole mwaamukhaani a khalayi aahitiwe muru awe iwe. Miyo kaaheemela vakhiviru va nipuro naahitiwe muru awe. Masi, oh, muru awe ori v'erutthu vale vasya, ni khivanweryaneya ohitiwa-tho. Ni owo ori weuwe ni yaawo minuutu ene yoola, murummwa mmosaru yoowo olempe Ela. Nto iirale, “Wa nyuwo muri mwa Kristu Yesu! Mwa Eroho emosaru hiyo othene noopatisiwa mw'Erutthu yeela emosa.” Vano nwehe.

Mahala akhale ni nyuwo, ni murettele, wa Muluku Tith'ihu, ni...Pwiya Yesu Kristu.

Attotopeliwe Muluku ni Tith'awe Pwi'ahu Yesu Kristu, yoowo onireerinhe ni othene...

Oh, munniiwa eyo, Charlie?

...yoowo onireerinhe ni mareeriho othene a muroohoni...

⁸⁹ Kahi kamosa-kamosa paahi wa arummwa, ni akina *ela*, masi Owo onireerinhe ni mareeriho othene a muroohoni. Eroho Yowarya emosaru yaakhurunwe Nihiku na Pentekosite ti Eroho Yowarya emosaru va ohiy'ula. Eroho Yowarya emosaru yaamwiirinhe Maria okhuwela n'ulavula ilavulelo, n'ukhalana okathi wooreerexa ni otthapa, ni itthu owo iiraly'awe, ti Eroho Yowarya emosaru va ohiy'ula. Eroho Yowarya emosaru yaamuhin'ye Paulo mukalawani mme, memmo waakhala ntoko waasanrye maasi ni aahirimeela, nto mahiku muloko ni maxexe ni ohiyu, woohikhala mweeri wala ittheneeri. Owo khuweha ota iwe nto khula niwimpi naahikhalana xetwani memmo, owehaka, ni oserimihaka maino awe, ni iiraka, “Kinimoosamihani nyu, mmiravo, vano. Kihooophwanyani vano.”

⁹⁰ Nto okathi Paulo aaronw'awe olompa vakhani, vale naaheemela Nlaikha, khwira, “Muhoove, Paulo. Ekalaw'ela enrowa osama vasulu v'esisiro emosa. Rowakani mwalye yolya anyu, sothene siri sana vano.”

⁹¹ Va owo aarwa ni makwicili ale mmiyoononi mw'awe sikhaani, apurulaka munawoni mw'awe, khwira, “Mulipihe murima, alopwana, maana Muluku, Nlaikha na Muluku, yoowo onimurumeel'aka, nookikhumelela khwira, 'Paulo, muhoove.”

Eroho Yowarya emosaru yeele eri vaava ohiy'ula, Eroho emosaru ya Muluku, enirumeelaka hiyo mareerihho mamosaru a muroohoni.

...onireerinhe ni mareerihho othene a muroohoni ari osulu wirimu...

⁹² Oh, nrowe neemele-tho minuutu mmosa vaava. "Osulu Wirimu." Vano, kahi nipuro pi nipuro tu, masi osulu Wirimu. Hiyo nithukumanne "Wirimu," enihimya wira voopuroni va mulipa-oowaamini. Wira, kakhalaru oolikana mwa mavekelo, nyuwo khukhala oolikana mwa mavekelo, wala ekereja khukhala yoolikana mwa mavekelo, ni hiyo khulikana mwaha wa Mutthaka, ni wira noothukumana vamosa ntoko masantu, oowiihaniwa, oopatisiwa ni Eroho Yowarya, oosareya iparakhha sa Muluku, oowiihaniwa, oothanliwa, nikilanthe vamosa osulu Wirimu vano, hiyo n'athu a Wirimu mmunepani mwahu. Irooho sahu sooniruuha mpakha mukhalelo wa Wirimu. Oh, munna! Eyo eri vo, mukhalelo wa Wirimu! Oh, exeeni yaawerya okhumelela ohiy'ula, exeeni yaawerya okhumelela ohiy'ula vaakhanle wira naamukilaathi va mwa mukhalelo wa Wirimu, nto Eroho Yowarya yeettaka khula murima oyariwe-tho khukhala yoopattuxiwa esya mwa Kristu Yesu? Itampi sothene vathi v'Ephome, mwa okokhorela wooreera voomalela, ni matata ahu avenxeriwe-ene Muluku ni mirima sahu soovenya sene, nikilanthe-ene osulu Wirimu mwa Kristu Yesu, nikokhorelaka vamosa osulu Wirimu.

⁹³ Mwaahinto okilaathi mwa nimosa? Oh, kaahinto okilaathi mpakha wunla mwaha w'otthapa ni wira, "Muluku, muhikihye kikhumaka va." Osulu Wirimu paahi mwa Kristu Yesu!

⁹⁴ Onireerinhe ni exeeni? Ovonihha wa Muluku, onisuwela khalayi ene, muupululo, soowoona, ikuru, ilavulelo, otaphulela, osuwela, ankhili, mareerihho othene a Wirimu, ni otthapa ohinihimeya ni woosareya Ovuwa, khula murima osarihiwe-ene ni Eroho, neettaka vamosa, nikilanthe-ene vamosa osulu Wirimu, nnakhala muupuwelo mmosa wootakhala eriyari ahu, hata sikaro mmosa oovuriwa, hata evestiitu yookhuvaya, nnakhala emosa *ela*, *ele* wala *ekina*, nnakhala muupuwelo wootakhala, khaavo mutthu orina hat'etthu ya nthowa ni mukina, atthu othene elavulaka ni mphento ni wiiwanana, atthu othene ni muupuwelo mmosa nipuro nimosa, "nto naanaanoru waahiiwanyeya okhumaka Osulu oruma ntoko epheyo enoopa n'ikuru." Eyo eri vo, "Onireerinhe ni mareerihho othene a muroohoni."

⁹⁵ Vano Eroho Yowarya yaamuweryaneya ommorela mutthu, ni wira, "SIISO ANIHIMYA T'APWIYA. Murowe nipuro khata mwiire etthu khata." Nwehe ekhumelelaka voolikane-ene *siiso*. [Munna Branham onrumiha ikatha sawe—Mol.] Munnona? "SIISO ANIHIMYA T'APWIYA. Mwiire etthu khata nipuro

khata.” Nwehe ekhumelelaka *siiso*. [Munna Branham onrumiha ikatha sawe.]

⁹⁶ “Onireerinhe vamosa ni mareeriho othene osulu Wirimu.” Nwehe!

Okhala wira owo oonithanla . . .

⁹⁷ Hiyo nimuthanlale Owo, ahiiso Owo onithanlale hiyo? Owo t'onithanlale hiyo. Liini? Ohiyu omukupanly'ahu Yoowo? Oothanliwa!

*Okhala wira owo oonithanla mwa yoowo
ohinatthi opattuxiwa olumwenku, wira nikhale athhu
ooreera murima . . . oohittheka vamaithoni vawe . . .
(miromolelo?) . . . moophentani:*

⁹⁸ Muluku onithanlale liini? Muluku oothanlaleni liini nyuwo murina Eroho Yowarya? Owo oothanlaleni liini? Ohinatthi opattuxiwa olumwenku. Ni osuwela Wawe khalayi ene, Owo aahiwoonani ni aahisuwela wira nyuwo mwaamurowa omphenta Owo. Ni ohinatthi okhala opattuxiwa w'olumwenku, Owo ohoohanlani, nto khimuruma Yesu wira Owo akhale muttipiheryo wa itampi sanyu, wira owiihaneleni moowaataanani, wa yoowo Mwaneene, mwa ophenta. Oh, kaanithuna nikhalanne-ene minuutu vakhani s'okathi.

⁹⁹ Mukihiye, nihinatthi orowa hata ottaiwene, nitthikele, Maphattuwelo 1:26. Kinootthikela Namararu. Okathi Muluku ompattuxaly'awe mutthu . . . Owo ohinatthi ompattuxa mutthu, Owo iisiihanne Mmansawe “El,” E-l, El; E-l-h, “Elah,” “Elohim.” Nuulumo nnihimya, mw'eHeperi, “ole okhanle mmansawe,” sothene mwa yoowo Mmansawe. Khiivo yaakhanle Owo ohinatthi, Owo aari okhala wothehe waakhanle, Ole onikhala mmansawe! El, Elah, Elohim, enihimya “ole oomalela mwa sothene, othene oowerya, Oowerya sothene, Ole okhanle mmansawe.” Oh!

¹⁰⁰ Masi mwa Maphattuwelo 2, okathi Owo ompattunx'awe mutthu, Owo iirale, “Miyu ka,” Y-a-h-u, J-u-v-u-h, *Yahweh*, “Yehova.” Eyo yaahimyani? “Miyu ka Ole okhanle mwa sothene Yoole opattunxe ethu mwa Yoomi, wira okhale mwan'Aka, wala a okathi vakhani, wala oosuwela vakhani, mwaamukhaani Aka.” Ovuwa! Mwaha wa xeeni? Owo aamuvanhe mutthu . . . Yehova enihimya wira Owo oomuvaha mutthu okhala muluku oosuwela vakhani. Okhala wira Owo ti Muluku Tithi, nto Owo aamupattunxe mutthu muluku oosuwela vakhani, tivo Owo kahi ookhala mmansawe tho, Owo onikhala n'amusi Awe. Elah, Elah, Elohim. Vano, vano Owo ti Yehova. *Yehova*, enihimya, “Ole onikhala n'amusi Awe.” Vano, Muluku aampattunxe mutthu wira akhale oowerya elapo yothene ya vathi, owo aahikhalana emwene. Nto elapo ya vathi yaari emwene ya mutthu. Eyo ti Yoolempwa? Vano eyo yakhala emwene awe, owo aari muluku a vathi. Owo aaniwerya olavula, ni yaakhala siiso. Owo aaniwerya

olavula *ela*, ni yaakhala siiso. Oh! Owo ori vo, Muluku, Yehova, Ole aatonko okhala mwa okhala mmansawe, masi vano onikhala n'amusi Awe, ni axikhaani Awe ni Yoowo. Eyo eri vo.

¹⁰¹ Vano, nkasomani yeeyo. Nnoophiyerya yeeyo Namararu ohiyu, nakhalanaru okathi-tho. Nrina paahi minuutu soophiyaka muloko ni mithanu ni nnoo...Koono wira kaamuphiya nipuro nimosa va, masi khaninrowa, vaavo nitthittiw'ahu ni Eroho Yowarya ya natiri. Vaareera.

¹⁰² Vano, hiyo niihaniwe liini wira nikhale arumeyi a Muluku? Orman Neville iihaniwe liini wira akhale murumeyi a Muluku? Oh, wulu! Ela ennikithamaliha. Kinimooleelani, nrowe nikuxe Soolempwa kamosa-kamosa. Kintthuna mmukuxe Petru Oopacerya 1:20. Nto, Pat, mmukuxe Wiisuupulula 17:8. Ni miyo kinimukuxa Wiisuupulula 13. Vano ninthuna niwiriyaneyane va, muntthuna musuwele okathi Muluku owiihann'aweni wira mukhale muKristu. Oh, okisivela ela. Ela, "Mutthu khankhala mukumi ni yolya paahi, masi ni Masu othene ankhuma mwaano mwa Muluku." Vaareera, Munna Neville, moomuphwanya Petru Oopacerya 1:20. [Munna Neville oniira, "1:20."—Mol.] Ahe, musome 1:19 ni 1:20. Nwiriyaneyane ela. ["1:19 ni 20."] Ayo. [Munna Neville ommusoma Petru Oopacerya 1:19-20.]

Nto n'iphome yooreerexa ya Kristu, ntoko mwaapwittipwitthi oowiisumaaliha ni ohinraviheya sootheka:

Yoowo tthiri aakhalihawe khalayi ohinatthi opattuxiwa olumwenku, nto khooniheriwa mahiku ala ookiseya mwaha wa nyuwo.

¹⁰³ Owo aakhalihawe liini? Ohinatthi opattuxiwa olumwenku. Munna Pat, mukisomele Wiisuupulula 17:8. [Munna Pat ommusoma Wiisuupulula 17:8—Mol.]:

Enam'eyo yoonalyanyu yaari ekumi, nto vano khinkhala-tho; enrowa okhuma mweepiphini, ni enrowa opwetexiwa: siiso athu ankhala mulaponi anootikinihawa, yaawo masin'aya ahilempwe muliivuruni mw'ekumi okhuma opattuxiwakaru olumwenku, vanrow'aya woona enam'eyo yaari ekumi, ni vano ehikhanle, nto entthikela okhala.

¹⁰⁴ T'ani anrowa wootothiwa? T'ani anrowa wootothiwa ni mutth'ula natiini ntoko Sawuli sootothiwaawe? Owo aari oolavilavi sana ni oolikanexa mpakha aarow'awe woototha exeeni? Yaawo O-...[Muthukumano oniira, "Oothanliwa."—Mol.] vaakhanle wira...["vaaniweryaneyane."] vaaniweryaneyane. Vaareera, Wiisuupulula 13:8, mukihaye koosomeleni.

Atthu othene ankhala elapo ya vathi anrowa... othene ankhala elapo ya vathi anrowa omukokhorela yoowo, yaale masin'aya ahilempwe muliivuruni mwa

Mwaapwittipwitthi iiviwe ohinatthi opatuuxiwa olumwenku.

¹⁰⁵ Masin'ahu aheliwe liini muLiivuruni mw'Ekumi ya Mwaapwittipwitthi? Okathi Mwaapwittipwitthi iiviw'awe ohinatthi opattuxiwa olumwenku. Okathi Muluku aary'awe Yehova, El, Elah, Elohim, Ole okhanle mmansawe. Ntoko Nluku noowarya nuulupale, ni Owo khaawerya okhala hat'etthu ekina, masi muhina mwa Nluku nla noowaarya mikhalelo Sawe aari Moopoli. Mwa mikhalelo seiya, muhina mw'Awe, aari Mpenuxa. Ahe, khiyaakhanle hat'etthu wira yoopoliwe ni hat'etthu wira evonihawe, masi mikhalelo Sawe khikumiherya eyo. Tivo, nto ohinatthi opattuxiwa olumwenku, okathi Owo aasuwenly'awe, wira wooniherya wuulupale wa Yoowo mu, wira Owo aarowa okhala Moopoli, wira Owo aamoowa ni akhale erutthu ni akhale ni hiyo, ni Owo aanisuwela wira makhwatta Awe yaamunivoniha, Owo khumwiiva Mwaapwittipwitthi muLiivuruni mw'Awe ohinatthi opattuxiwa olumwenku, ni khulepa nsina nanyu muLiivuruni memmo ohinatthi opattuxiwa olumwenku. Oh!

¹⁰⁶ Nwiriwane Ela! Otthommwa onweha ottuli mwa osuwela khalayi ene, kinihimya othanliwa. Othanliwa ontthikela oweha ottuli mwa osuwela khalayi ene, ni otthommwa onweha w'ekiseryo. Muhiliyale eyo, wira othanliwa onweha ottuli nno, ela eri va, "Miyo kaari mwiiwa. Kiyariwe mutampini, opakiwa mwa sootakhala, kirwiiye mulaponi koothaka, kiyariwe eriyari y'anatampi. Atithi aka n'ame aka ni othene amusi aka othene, anatampi. Miyo kaari mwiiwa. Masi, naanaanoru, khukhala-tho enuku y'etriku. Yiireiye sayi yeeyo?" Eyo, exeeni iyo? Othanliwa. Muluku, ohinatthi opattuxiwa olumwenku, aaroothanla wira mwiiw'owo waari wira okhale enuku y'etriku. "Vano koosuwela wira k'enuku y'etriku, okhala wira kihoopowa. Kiniira sayi?" Kinweha ottuli ni woona wira Owo orootthoma, okathi munciene ovinre. Mwa osuwela khalayi ene Owo aahoona wira miyo kaamumphenta Owo, tivo Owo khupaka ettipiheryo mwa Mwan'Awe Yoowo, wira mwa Yoowo kiwerye okhala okhuma mwiiwa kikhale enuku y'etriku. "Vano, kiri vayi vano?" Kihoopowa, kineetta mwa mahala a Muluku. "Otthommwa oniweha exeeni?" Ekiseryo. "Owo onrowa okiroiha vayi, ni kinrowa vayi?" Amen. Eyo ehoovarani. Eyo eri vo.

¹⁰⁷ Vano nrowe nisome ohoolo vakhani tho, vano nto nnoomalihana naanaanoxa.

Okhala wira owo...oonithanla mwa yoowo ohinatthi opattuxiwa olumwenku, wira nikhale ooreera murima...oohittheke vamaithoni vawe moophentani:

Owo oonitthoma okhuma khalayi wira nikhale aana, oonitthoma wira nikhale aana mwa Yesu Kristu mwaneene, ntoko suupuwenly'awe n'utthuna wawe,

108 Owo iirale exeenii? Owo, mwaha w'osuwela khalayi ene, aahinoona khalayi ene, asuwelaka wira Owo aari Moopoli, okhala mmansawe. Khayaakhanle hata Malaikha, hat'etthu; Muluku paahi, Elah, Elohim, Ole okhanle mmansawe, hat'etthu woohikhala Yoowo meekh'awe. Masi mwa Yoowo aari Moopoli. Ahe, Owo onrowa woopola exeeni, ehikhanle hat'etthu epweteiye? Asuwelaka yeeyo, nto Owo aahisuwela wira mukhalel'ola muulupale mwa Yoowo waamurowa otthokiha etthu ohoolo Owo aarow'awe woopola. Vano vairaly'aya siiso, mwaha w'osuwela khalayi ene Owo khuweha vathi nto Owo khuwoona atthu othene yaarowa okupali Yeeyo. Vano nto airaka siiso, Owo khwira, "Wira kimoopole ole, enamuna emosa paahi kikhanly'aka wira, enrowa okhala okhuruwa Mmansaka ni wiipaka erutthu ni okuxa etampi ya mutthu mwa Yoowo, ni omukhwela, wira kikhale Ole onikokhoreliwa," okhala wira Owo Mulukuu, etthu enikokhoreliwa.

109 Vano Owo khikhuruwa khwiikhaliha Mmansawe. Nto okathi wiiraly'awe siiso, Owo iirale eyo wira awoopoleni nyuwo munthuna woopowa. Munnoona entthun'aka ohimya? Mwaha w'osuwela khalayi ene, Muluku ohinimala, Yoole aasuwenle itthu sothene, aahimoona Mwaapwittipwitthi, nto Owo khumwiiwa Mwaapwittipwitthi ohinatthi opattuxiwa olumwenku, nto Owo khuhela nsina nanyu muLiivuruni mw'Ekumi ya Mwaapwittipwitthi. Ni Owo aahoono woottha wa Satana, etthu aarow'awe wira. Vano Owo khuhela nsina nanyu memmo. Ni Owo ohimye wira nwanani a Kristu aarowa okhala natiini sana, ooreera murima, mutthu ooloka, mutthu oosuwela, mutthu natiini, mpakha aarow'awe owoottha ale oothanliwa vaakhanle wira vaaniweryaneya. Masi ti voohiweryaneya, okhala wira masin'aya akhalihawe khalayi ohinatthi opattuxiwa olumwenku. Mwaha w'othanla Owo ohaathanla, ni mwaha wo otthommwa awo annisuwela otthu anrow'aya. Eyo eri vo.

110 Vano, t'ani aarowa ohoverya yeeyo? Ti yeeyo Paulo ehimpy'awe. Eyo ti Yoolempwa ya Paulo. Eyo ti yoolepa ya Paulo. Ti yeeyo owo iixuttih'awe ekerej'awe. Ekereja, voopuroni, ohinatthi opattuxiwa olumwenku. Okathi Muluku, mwa owereya Wawe w'oyara, aayar'awe, ooyarakani nyuwo, asuwelaka etthu mwaarow'anyu wira, Owo aahookhalihani voopuroni vanyu muhina mwa Erutthu Awe yoowo Mwaneene, wira mukhale muhana a vatthokoni, wira mukhale mulimi, wira mukhale mulaleyi, wira mukhale profeta, wira mukhale *ela* wala mukhale *ele*. Owo aahoohelani voopuroni. Vano okathi okhummy'ahu mittetthe s'ayu sa wEjitu, niviraka mooreerihiwani, nto khupatisiwa nikelaka muttetthe wa natiri...Maana, natiri a Muluku ti Eroho Yowarya. aEfeso 4:30, aahimya, "Muhiriipihe murima Eroho Yowarya ya Muluku yeeyo mutthittiw'anyu ekanyeryo mpakha nihiku

nowoopoliwa wanyu.” Vano Muluku, othomme-ene ekereja, Owo iirale, “Nto atthu othene, anookhala atthu imilyawu vaara imilyawu sene anrowa weettela etiini sana nave anrowa wootothiwa.” Ale ahinrowa wootothiwa paahi anrowa okhala ale akenle muttethe wa natiri, yaale ohinatthi opattuxiwa olumwenku yaarina masin’aya aheliwe muLiivuruni mw’Ekumi ya Mwaapwittipwitthi, ni arwiye mpakha muttethe wa natiri, ni anoona oreera.

¹¹¹ Atthu anci-ene animoova nyuwo wira itthu sootheiha. Atthu anci-ene animoova Eroho Yowarya owiirihani nyuwo wira etthu nyuwo—munrow’anyu wuuliwa muru n’atthu. Atthu anci-ene animoova wira anrowa wunla, ni wira amweetti aya anoorowa owoona yinlaka, wala amey’aya, wala anamaitthoko anyu, wala mukhulupale anyu onoowoonani.

¹¹² Mukihiye kooleeleni mwaha wa mulopwana mmosa emaaara emosa, kihinatthi omaliha. Aahikhala mulopwana mmosa aihaniwa Davidi, nto okathi nivuku na Muluku naakhanly’aya muttethe w’aFilisti, vano Nlo khulapuwela epantte ekina, khipuruliwa ni ekalawa, enyompe yaamupurula, okathi Davidi oonaly’awe nivuku nle nirwaaka, owo aahikhalana ekuwo ya niira aawanry’awe, owo khutthimakela vale, khikumaniha inawu sawe osulu, khutupha-tupha, khunyakula khutupa, khwiina khutupha khwiina. Nto, owo, mwene a Isarayeli! Nto amwaar’awe khuweha vacanelani khumoona owo airaka itthu vootikiniha-vo sana, awo khimunyemula. Vano, khino awo yiirale, “Naanepa! Khunweha vate vale, moota iiraawe, arihaka inawu sawe osulu, ni atuphaka airaka siiso. Vano, ale siiso avahunwe-ene!” Nto ohiyu yoole okathi okenly’awe, awo khwira, mwa moolumo ntoko ala, “Vano, nyuwo mookixankiha. Vano, nyuwo, mwene, aiy’aka, vate vale mwiiraka siisaale, mwiiraka siisaale!”

¹¹³ Davidi khwira, “Meelo kinimwiira vooreera ovikana ele. Ayo, mulopwana!” Owo khwira, “Khamusuwenle wira kaawinela Apwiya?” Owo aahilapuwu! Owo aari muttethe wa natiri. Owo aahipwetexa inamuna sawe sothene ni otakhala wa mulaponi. Owo aahitteeliwa murima sana osuwela wira nivuku naarwa epoom’awe.

¹¹⁴ Nto, oh, kinimooleelani, atthu kamosa-kamosa annoova waakhela Eroho Yowarya, woova wira anoolavula ilavulelo. Awo animoova wira mutthu aamuhimya wira, “Vano, ole mmosa w’ale anlavula ilavulelo.” Awo animoova orwa okereja khupatishiwa ni Nsina na Yesu Kristu, okhala wira awo anuuleliwa muru Yeeyo. Uh! Oh!

¹¹⁵ Ookhala mutthu iirale wira kaahaana ohokoloxa ifiita saka, okhala wira kaaroolaleya mwaha wa opatishiwa ni Nsina na Yesu Kristu. Miyo nkinhokoloxa. Kinoopaka tho! Eyo ekeekhaii, wira, kinoopaka tho! Owo Bibiliaa. Awo yaahaasiveleke ele

niiraly'ahu nsana, nwehe paahi enrow'ahu wira meelo! Eyo t'itthu yo wira, moone, mukhale murowaka paahi. Khekhanle emalelo wa yeeyo, okhala wira eyo ti y'Apwiya. Ti Muluku.

¹¹⁶ Moosuwela etthu Muluku iiraly'awe? Muluku aarooweha vathi okhuma Wirimu, Owo khwira, "Davidi, nyuwo mwa mutthu oneettela murima Aka." Davidi khuuliwe muru. Owo aari murumeyi a Apwiya. Owo aanaaphenta Apwiya. Ni owo aahitteeliwa murima sana, oosareya otthapa, mpakha vahuupuwenly'awe ottittimihiwa ni mutthu.

¹¹⁷ Moone, ntoko sihimaly'aka mmutthakani mwaka voosiis'ula, hiyo khaninreere woova, mpakha, nimmutthun'ahu Sawuli wira aniixuttiheke, nimmutthuna Sawuli onikhuma eseminaariyu khata wira anileeleke moota entthuney'aya otthara etini ahu moota entthuney'aya wira. Eyo eri epantte ekina ya Yordani. Epantte ela, Eroho Yowarya t'eneettiherya. Nno muri ota wa soonanara iyo. Nno nyuwo khamuncaliwa n'itthu awo anuupuwel'aya. Nno nyuwo muhookhwa, ni ekumi anyu yoosukiwa mwa Kristu mwa...ni mootthittiwa ni Eroho Yowarya. Khamuncala. Munikhala oKanani. Munniwerya ovilela yolya yooreera. Nyuwo mwa mutthu musya mwa Kristu Yesu. Muneetta nrowaka muttetthe wa natiri.

¹¹⁸ Kinnuupuwela keemenle-ene iwe, Munna Collins, iyaakha soophiyaka miloko miraru sivinre, okathi ekerej'ela yiiraaya ehitekiwe nlelo. Waari muthukumano mwaamukhaani wa muheemani yaaheliwe va vanlothoni, muthukumano aka woopacerya. Kaaleleerya Ehapari yooreera yeela, etthu emosaru, muhakhu ohintaphuleleya wa Kristu, opatiiso wa mmaasini ni Nsina na Yesu Kristu, kaaminiki wira khula Masu Ekeekhaii, opatiiso wa Eroho Yowarya, ovoniha wa Muluku, owerya wa Muluku, siiso ntoko sinlaley'aka Yeeyo vano, nkinavirikaneke hata esentiimeturu emosa ya Yeeyo. Muluku ookuupululelatho Yeeyo miyo, tivo, Owo uupululaka Eyo, miyo kintepa oruuha. Owo khonakumiheke etthu ekhanly'aya, Owo onootepa ancereraka Yeeyo.

¹¹⁹ Miyo kaari vale okathi atthu oophiyaka imiya thanu yeemenly'aya mukerekhere wa muro, yiipaka, "Miyo kineemela muhitte wa Yordani owoopiha, n'urihela niitho nootthunaxa, kiwehaka muttetthe wooreera ni wootteeliha murima w'oKanani, weiwo siniphwanyaney a itthu saka. Kinrowa ophiya liini olimani iwe w'ekumi ni kireerihiwe mahiku othene, kinrowa ophiya liini kikhale mw'Atithi aka...kimumule mahiku othene?" Vapaceny'aya wiipa yeeyo, miyo kaamukuxa mmiravo mmosa kimuroihaka mmuro wira kampakise mme mwa Nsina na Pwiya Yesu. Miyo khwira, "Tithi a Wirimu, kinimuruuha mmirav'ola wa Nyuwo kittharihaka olapa wawe..." Mmiravo paahi, yoomi, kookhalana elatarato ene owaani. Miyo khwira, "Okathi ommupatis'aka ni maasi, Pwiya, kittharihaka olapa wawe, ni Nsina na Yesu Kristu Mwaana a Muluku, Nyuwo

munoomusariha ni Eroho Yowarya.” Nto okathi ene yoole Etthu emosa khirumiha eyuupuru, nto va Eyo khurwa erumaka erwaaka vathi, Ettheneeri Yoowarya ni y’Oxaka khukhala vale. Vale waari Waarya yoole munoon’anyu valatarotoni vaavale vale. Owo khweemela vale.

¹²⁰ Owo khurwa mulaponi mothene, mpakha oCanada ni mapuro makina. Atthu khwira, “Waarya wootikiniha onikhumelela vasulu va murumeyi mmosa muPatista a elapo yeeyo okathi aapatis’awe.”

¹²¹ Mahiku vakhani avinre, okathi Totori Lamsa aarwiiy’awe wa miyo, nto khaasuwela hat’etthu ya yeeyo, khukiruuhele elatarato ene, yeeyo munna orin’awe vale naanaano. Mookhalana elatarato ene? Mookhalana Bibilia ni nyuwo, ori vo, eri muliivuruni mwanu? Vaareera. Yaahikhala elatarato ya ekanyeryo ya khalayi y’eHeperi ya Muluku, vekeekhai yeele yaakhanle mahiku a Yobi, Bibilia ohinatthi hata olempha. Muluku mwa mikhalelo Sawe miraru, kahi amuluku araru. Muluku mmosa mwa mikhalelo miraru. Tithi, Mwaana, ni Eroho Yowarya, miteko miraru Muluku aavar’awe-mo muteko. Kahi amuluku araru, mikhalelo miraru! Nto Eyo yaari vale. Okathi mulopwan’ole muuluapale, Totori Lamsa, otaphuleliwa wa Bibilia Lamsa, okathi wiiraly’awe voosiis’ule. Okathi omuhimery’aka yeeyo, miyo khwira—miyo khwira, “Ekanyero ele exeenii?”

¹²² Owo khwira, “Ele ekanyeryo ya khalayi ya Muluku, mw’eHeperi. Muluku, Muluku mmosa mwa mikhalelo miraru.”

Miyo khwira, “Etthu ntoko Tithi, Mwaana, ni Eroho Yowarya?”

¹²³ Owo khweemela, nto khupweha vathi muhas’awe w’ekafe, khukiweha. Gene, kookupali wira mwaari vaavo, Leo. Khwira, “Munnaamini yeeyo?”

Miyo khwira, “Ni murim’aka wothene.”

¹²⁴ Owo khwira, “Nsana ohiyu, keemenle-ene vamuthukumanoni vanyu, Munna Branham, kaahona othokorerya iwe. Nkinatoko woona khalayi wAmerika, mulaponi mwaka.” Owo khwira, “Atthu ala a wAmerika hata khammusuwela Bibilia. Etthu emosa paahi ansuwel’aya muromolelo aya. Awo hata khansuwela vary’aya.” Khwira, “Awo khansuwela hat’etthu.” Owo khwira, “Masi veemenly’aka vale nsana ohiyu,” khwira, “Miyo khwira. . .” Vano, Munna Gene, miyo kinihimya ela ni nttittimiho ni mphento ni yeeyo. Owo khwira, “Miyo khwira, ‘Ohaana okhala profeta.’ Masi koonaka wira nyuwo munnaamini wira Tithi, Mwaana ni Eroho Yowarya khayaari amuluku araru, saari mikhalelo, vano koosuwela wira nyuwo mwa profeta a Muluku, ahiiso khimwaarowa wuupululeliwa siisaale.” Owo khwira, “Ele akanyero yoolikana.”

Khwira, “Miyo nkinatoko...” Khwira, “Nyuwo khamuhiyo unisista?”

¹²⁵ Miyo khwira, “Nnari, mulopwana. Nkihiyo unisista. Miyo kinaamini wira Muluku ti Muluku Oowerya sothene, ni mikhalelo miraru miteko miraru paahi seiyo Muluku mmosa aakhal’awe-mo.”

¹²⁶ Owo khwira, “Oreerihwe murim’anyu!” Owo khwira, “Nihiku nlo munoomwaraxela ephome anyu vathi mwaha wa yeeyo, masi,” khwira, “maprofeta kweekwe anikhwela mwah’aya.”

¹²⁷ Nto miyo khwira, “Ekhale siiso, vakhalaru wira t’enaasivela Apwi’aka.” Otaphuleliwa wa Bibilia Lamsa.

¹²⁸ Oh, eyo ekeekhahi. Imaara kavi, ntoko sinihimeery’aka ekerej’ela, ntoko Samuweli aahimmy’awe atthu ehinatthi omuthanla Sawuli, “Muhinatthi okhuma khwiitakaniha muromolelo vano, ni wiikelihya othene muhina mwa muthinto mmosa wa etiini, muhinihiyeryani Eroho Yowarya oweettihani?” Muhinimukuxeryani Muluku ntoko Muhooli anyu ni omuhiya Owo wooreerihani, n’uliyala muromolelo anyu. Vano, miyo nkinihimya wira muhiire mpannta wa muromolelo wa ekereja, mwiireke mpannta wa khula emosa entthun’anyu wira. Eyo ti yawinyu. Masi kinooleelani, ntoko mutthu mmosa, muhiye Eroho Yowarya eweettihekeni. Nyuwo munnimusoma Bibilia. Nto ele Bibilia enihimya’awe wira mwiire, irakani. Muluku ooreeriheni.

¹²⁹ Nto vano koolipelela okathi munci-ene. Kaatthuna kisuwele sinto ookhala mutthu va aatthuna orwa muliinyani mwa mavekelo wira avekeleliwe. Yakhala vale, avenxe matat’aya. Mmosa paahi, aili, araru. Vaareera. Nyuwo othene murwe osulu nno mweemele va mwatthuna vale, okathi ula, nto—nto ninookhalana mavekelo. Vano nto hiyo... Nkinthuna wira mukhume nlelo. Kintthuna kiire etthu ekina va vootitimiheya nihinatthi o—omalihya.

¹³⁰ Akavi onaasivela osoma eliivuru y’aKalasiya...oh, kinihimya aEfeso? Vano, Namararu ohiyu, ninrowa okelela Ekanyeryo. Vano nto Ettiminku enrwa voosiisu, ninrowa okhalihya ekereja voopuroni vaha. Oh, vakhala wira...hiyo alakela nnookela mwa yeeyo, Namararu ila enrwa ohiyu, wa nyuwo atthu va oJeff. Ohela ekereja voopuroni vaha vaavo awo akhanly’aya a vaavo, khula mmosa. Moota onihaniw’ahu mwaha w’okhalihya aana. Muluku oonikhalihya hiyo aana, hiyo n’aana mwaha w’oyariwa. Ookhalihya aana ni ookhalihya voopuroni vaha ni Eroho Yowarya. Nkawehani! Awo yaari aHeperi khula mmosa, okathi yaalapunw’aya muro, masi Yoxuwa khukawanya muttethe khunvaha khula mmosa muttethe awe attharihaka ehimyeryo y’ame awe okathi w’oyara, vaavo Eroho Yowarya yaamuleel’aya muthiyan’owo.

¹³¹ Nkanwehani Yakope okathi waakhw'awe, profeta, oohoona, aahiweleliha inawu sawe voolilini, khwira, "Rwaakani nyuwo aana a Yakope nto kinimooleelani onrow'anyu okhala nihiku nookiserya." Ovuwa! Oh, koosuwela wira kinooneya ntoko ootikiniha. Atthu animooneya ntoko ootikiniha. Masi, oh, vaakhanle wira mwaanisuwela n—nrromelo, ovi—ovihiwa vamurimani! "Rwaakani kinimooleelani onrow'anyu okhala mahiku ookiserya." Ni kinniwerya okuxa Yoolempwa ene yeeyo, kikuxe maapha a vatthu aYuta aniphwanyaney'aya olelo ni owooniheryani wira awo ari nipuro nenlo Yakope aahimmy'awe wira yaamukhala mahiku ookiserya. Nto awo khanakhaleke, iwe, khanakhaleke nipuro nle mpakha vahokolonw'aya okhuma mahiku yeettaka mathanu na maili mweeri wa Maio, 1946, ohiyu yoole Nlaikha n'Apwiya naakikhumelenly'aya osulu iwe khuhimya mwaha wa muteko yoola. Ni kinoowerya owooniheryani wira, okathi awo ahokolowenly'aya muttethe musya, veekeekhai awo yaahiphiya mapuro yaawo Yakope aahimmy'awe wira yaamurowa okhalasa. Nto awo anikhalasa weiwo olelo. Oh, oh, wulu, oh, wulu! Hiyo nri nihiku nimosanaattamelaka Owaani, ti yothene.

¹³² Nyuwo atthu oophentiwa, nyuwo munoowereiwa, ahiiso khamwaarowa okhala mweemenle-ene vo ori weemela wene paahi. Miyo ka munn'inyu. Kookhalana muteko orummw'aka wa Muluku wira kaavekeleleke aretta. Kahi ntoko yawaka... ntoko okhalana owerya wo ovoniha, nkirina. Masi kookhalana owerya w'ovekela. Ntoko sihimyaly'aka voosiis'ula, Davidi khaarina hat'etthu woohikhala pharancikula mwaamukhaani, masi owo iirale, "Koosuwela enrow'awe wira ni owerya wa Muluku mwa yoowo." Munnona? Kirina nivekelo naamukhaani paahi wira kivahererye mwaha wa nyuwo, ni matat'aka wira kiwiixaathereni, masi koosuwela exeeni omwaamini Muluku onrow'aya wira. Eyo ahiireliwa akina, enoowiirelani nyuwo. Mwaamini yeeyo vano okathi munaattam'anyu, okhuveela vakhaani paahi nipuro.

¹³³ Vano, kinniikoha, wira kikhalihe ela vooreerela sana, kamuvekela munn'aka wira orwe va aattikitthele makhura. Munimwiira yeeyo, Munna Neville? Kinoovekela ekereja wira muurame mwa mavekelo.

¹³⁴ Vano muupuwele, esumana evinre okathi waawereiwaaka sana ni makhura ale a ikhura, kaamunvaha etthu p'itthu vaakhanle wira mutthu aamuvira vale okiixaatherye matata. Vaakhanle wira kaahiwerya omwiiriha mutthu orwa vale, Muluku aamureerinh'awe ni omukhaliherya, miyo yaamukisivela sana. Nyuwo othene munnoona vano ntoko soon'aka nto. Munnoona vano wira muntthuna miyo kiire siiso ntoko kaatthun'aka wira mutthu okiirele nto. Muluku ahitthuniherye okhalakhala kixakaka muteko. Mukihiye okathi wothene, hata kikhalka ookhulumuwa, kikhalka oowooceya,

hata kihiweryaka ottukhula nnawu nimosa vasulu va nikina, mukhiye kirowe, okhala wira kinoorowa okumana-tho ni khula mmosa a nyuwo, iwe Muttetthe ole iwe.

¹³⁵ Vano nyuwo athiyana atokweene, alopwana atokweene, oowiiniwa murima, a maihi oottweelela ni ookhulumuwasa, nto ookhulumuwasa ntoko ethutu etthukunwe mumphuwoni mwaya naamukhaani, enimwary'aya makukhu aya n'umoramora, nyuwo munoomoramora kapatti-kapatti paahi, kahi siiso? Ti yeeyo. Paahi... Nto etthu emosa paahi muntthun'anyu ovarelelaxa waarya mwaha w'ovuwa wa Muluku. Tivo okathi nwanani oovanry'aweni vano khikhuma atthyawaka, kinoorwa ni pharancikula a Muluku, ni waamini, ni yoovaha Muluku ekivahaly'awe. Va eri ele kaahimmy'aka, wira mwiiwe sana. Miyo kiirale, "Vakhala wira Petru aamuvolowa, wala amosa-amosa wa awo." Muhihimeyeke yeeyo. Khamurina okivekelela. Nvolowe siisa, mwiire, ntoko wa muthiyn'ola, mwiire, "Nyuwo mwa Munna *Lexe lexe?*" Nsina nanyu ti pani? Munna Howard. Mwiire, "Nyuwo mwa Munna Howard. Nyuwo mwa mulipa-oowaamini, Munna Howard? Munnaamini. Nyuwo mwa mulipa-oowaamini. Vano, moone, mookhalana ihaakhi sa iparakhha sothene sa ovuluxiwa." Nto miyo kaamwiira, "Munna Howard, sothene sinookhala sana," nto kiroweke. Oh, moota... miyo khwira, "Kaamunyakula, kaamukhuwela." Kaamwiira, "Pwiya, vekeekhai ehaana okhala. Vekeekhai ehaana okhala."

¹³⁶ Nto miyo kuupuwela, "Ahe, atthu anuupuwela etthu ene yeeyo kaarwaaka waavekelela." Tivo ti yeeyo. Munnoona entthun'aka ohimya?

¹³⁷ Nto kiheemela, imaara sinci-ene, ni waakuxa atthu, ni wira, "Oh, munn'aka ooreerexa, munimwaamini Yeeyo? Oh, munimwaamini Yeeyo?" "Pwiya, O Muluku, nwaaminihe Yeeyo. Nwirihe awo waamini Yeeyo." "Oh, xontte, munookupali Yeeyo vano?" Kahi yeeyo. Miyo koovira mwa yeeyo. Miyo koovira ottaiwene wa yeeyo.

Miyo kinihimya ela paahi, "Munna Howard, nyuwo mwa mulipa-oowaamini?"

"Ayo, ka yoowo."

¹³⁸ "Vaareera, Munna Howard, mwaari mulipa-oowaamini, mwa mulipa-oorithi itthu sothene Muluku sirin'awe." Nto n'uvara ntata nawe paahi. Moone, miyo kinnaamini yeeyo. Miyo kinimukwannya Munna Howard kimwiixaatheryaka matata. Yesu khonahimeyeke wira "mwaavekelele," Owo ohimye wira, "Owiixaatherya matat'aya paahi yaawo." Ti yeeyo, vano owo onoovona. Owo onoowerya wira, "Sothene sinookhala sana," Munna Howard. Vano muroweke owaani mukhale mukumi. Muluku ooreeriheni.

¹³⁹ Nyuwo mwa munna... [Munna muthiyana oniira, "Hampton."—Mol.] Munna Hampton, nyuwo mwa mulipa-

oowaamini, khamuhiyo? [“Ka yoowo.”] Nyuwo mwa mulipa-oorithi a sothene Owo ovanh’awe. Muluku akhale ni nyuwo, Munna Hampton. Rowakani owaani mukhale mukumi vano. Yesu Kristu onimoovonihani.

¹⁴⁰ Nyuwo mwa munna... [Munna muthiyana onoolavula—Mol.] Slaughter. Eyo ti... Nyuwo mwa yoole naamuvekelenly’ahu oxipiritaali. Nyuwo mwa mulipa-oowaamini, nto, Munna Slaughter, mulipa-oorithi a sothene sinvekel’ahu. Munna Slaughter, mwaakhele sivekenly’anyu, mukhale mukumi. Muluku onimoovahani yeeyo.

¹⁴¹ Munna Gene, munnaamini wira Muluku onimoovahani? [Munna Gene oniira, “Ayo, mulopwana, Ayo, mulopwana.”—Mol.] Nto Apwiya Muluku yoovaheni, Gene, siiso ethu yeeyo envekel’anyu!...?...

¹⁴² Kinnoosuwelani. [Munna muthiyana onoolavula—Mol.] Nyuwo mwa mulipa-oowaamini, munna. [“Oh, ayo.”] Kinnoosuwelani. Ala t’aiy’anyu vale. Ti yaawo kaavekelenly’aka mutelefoonini nihiku nle. Miyo okathi wothene kinnuupuwelaka yeeyo. Khayaawerya orowa vamuthukumanoni oTulsa. Khurwa vamuthukumanoni. Nto Apwiya khwaavoniha, khwaaruma omuthukumanoni. Voorummwa nyuwo munimweemererya mutthu mukina. [“Musulu aka mulopwana.”] Ethu xeeni y’oKristu, munna! Munnona? Owo aari voorummwa nave. Owo aahineemererya hiyo othene. Nyuwo mwa mulipa-oowaamini ni mookhalana ehaakhi ya itthu sothene Muluku ohimmy’awe. Miyo ka murumeyi Awe. Ni mwa Nsina na Yesu Kristu, kinnoovahani envekel’anyu. [“Miyo kinnaamini.”]

¹⁴³ Murwe, Munna Neil. Muluku ooreeriheni. Yaahikhala yootepa oreera wa nyuwo. Nyuwo mwa mulipa-oowaamini. Koosuwela wira mwa yoowo. Kinnaamini wira Muluku onimoovahani sothene sinvekel’anyu, okhala wira mwa mulipa-oowaamini. Nto ntoko murumeyi Awe, wa nyuwo, munn’aka, mwa Nsina na Yesu Kristu, kinnoovahani entthuna murim’anyu. Rowakani mwaakhele. Muluku ooreeriheni.

¹⁴⁴ Munna Bruce, kinnoosuwelani. Nfurumeera mwaamukhaani aattikitthenle ettuli aka aanoosuwelani. Owo t’ohitto nno waattamela oMoteli JJ, Twin J, wala ethu ntoko yeeyo. Nyuwo munoowemererya akina. Nto munthunani ohiy’ula w’Atith’inyu? [Munna Bruce oniira, “Yawaka yoomi, ohiy’ula.”—Mol.] Yawinyu yeenyu, ohiy’ula. [Munna Bruce onoolavula-tho.] Vano, nwanani ohoorihelani ottaiwene ohimphiya tothoro, masi miyo kinimoorweelani, ni pharancikula. Nto mwa Nsina na Yesu Kristu, kinluluwanyiha ntthere nla na pharancikula vanlukuni nikenle musyoni mwa mukhalelo w’otthukweya. Nlo nnimoottikiheryani wa Muluku, owanny’Awe.

Hiyo nihoovekelani Nyuwo, mwa Nsina na Yesu Kristu. Amen.

145 Nyuwo mwa tithi awe mulopwan'ola, mulopwana? Mwa mulipa-oowaamini? [Munna onoolavula—Mol.] Mwaamukokho mpararini mwanyu; vathi, ni mpararini mwanyu woolopwana. Munnaamini wira Muluku onimoovahani, mulopwana, ni ntoko murumeyi Awe?

146 Pwiya, ntata nla khino noovara muteko woolipa wa nihiku. Orwiiye va mwaha wa niwoko, wira etthu. Munvahe, entthuna murim'awe, Tithi, ntoko sinvekel'aka mwa Nsina na Yesu wira Nyuwo munonvaha. Amen.

147 Muhihoverye. Mwaamukokho owo onohiya woowereyani vathi vo, ni munookhala sana. Muluku ooreeriheni munna.

148 [Munna mmosa muthiyana oniira, "Onikiwereya muru aka ni mmilo aka. Annikiwereya maparari kaakothomolaka. Nkinwerya wiipa. Nkinweya wira hat'etthu. Miyo...?.Ni nkinwerya orupa vanci-ene. Nkinwerya wira hat'etthu."—Mol.] Nyuwo mwa mulipa-oowaamini, khamuhiyo? ["Ka yoowo. Kooosareya Eroho Yowarya."] Nyuwo mwa mulipa-oowaamini. [Kooosuwela wira Muluku onkhala memmo."] Ni nyuwo mwa mu—mwa mulipa-oorithi a iparakha iye sothene. ["Kooosuwela. Ni kinnaamini. Kinnaamini mavekelo anyu, Munna Branham. Kinnaamini wira Muluku onookivoniha. Kinnaamini wira Owo onnaakhula mavekelo anyu."] Kooxukhuru.

149 Tithi, kinimuruuha ola, munn'aka, muliinyani mwa mooro, variyari va exeko. Ni kinimuhokoloxerya wa nyuwo, kimukumihaka munikwarikhwani mwa nwanani, mwa Nsina na Yesu Kristu. Amen.

150 Ti siiso paahi enrow'aya okhala. [Munna muthiyana oniira, "Ayo, Munna Branham."—Mol.]

151 [Munna mmosa muthiyana oniira, "...?.Kookhalana nsasu naakhwa, nto nimoso naahikhwa."—Mol.] Wooperariwa nsasu.

152 O Pwiya, ntoko mwamuthiyana'ola eemenly'awe va, nlelo mwa othapuluwa w'emiravo, miyo kinninvekelela. Nto nsasu nimoso naari wira nikumihiwe, nto owo aamuttiyeya, ekumi awe yothene. Nyuwo mwa Tith'ihu, ni kinttikhela mooro wa mavekelo wa yoola, Pwiya, kilukamihaka vansasuni vale. Kinvahererya nivekelo nla mwa Nsina na Yesu Kristu. Wira nimane nsasu nle nivonihe. Mwa Nsina na Yesu Kristu, kinvekela yeela. Amen.

153 Nyuwo mwa Munna...[Munna muthiyana'wo oniira, "Munna Gibbs."—Mol.] Munna Gibbs. ["Mmuruni mwene, ni kiwereiwaka mwaha wa yoowo."] Vekeekhai. Muru anyu onipakeya mwa miyo. Nyuwo mwa mulipa-oowaamini ni mulipa-oorithi iparakha sothene sa Muluku, Munna Gibbs.

154 Pwiya, miyo kinimuruuha owo wa Nyuwo, ni pharancikul'ola mwaamukhaani Nyuwo mukivahaly'anyu, ntoko saamuvahaly'anyu Davidi pharancikula, wira owehexaxeke ipwittipwitthi s'atithi awe. Nto nwanani avolowela vale epwittipwitthi, owo khoova. Owo aamukunxe pharancikul'ole mwaamukhaani khwaarowela naanaanoru akharamu ni—ni ikhaya, vano owo khuhokoloxa epwittipwitthi. Nla nivekelo na waamini. Nyuwo mwaahikileela wira “kaakhalinheru atthu waamini n'ukhala naxariya.” Kinimuhokoloxa Munna Gert ohiy'ula. Kinnimukumiha mmatatani mwa nwanani. Owo epwittipwitthi Anyu. Miyo kinimuhokoloxerya munikotoni mw'Atithi, mwa Nsina na Yesu Kristu. Amen.

155 [Munna mmosa muthiyana oniira, “Munna Lowe.”—Ml.] Munna Lowe. [“Kirina ikuru s'ephome.”] Ikuru s'ephome sinciene. Nto nyuwo mwa mulipa-oowaamini, mwa yoowo, Munna Lowe? Mulipa-oorithi a iparaxha sothene.

156 Vano, Muluku Tithi, miyo kinluluwanya nivekelo nla ohiy'ula, ntoko vapharancikulani va Muluku, wa ikuru s'ephome sa Munna Lowe. Nto okathi meetiku oniphim'awe ikuru s'ephome, owo anwehe aire, “Yoolikana vano.” Owo onoosuwela etthu yirale. Mwa Nsina na Yesu Kristu, kinninvaha. Amen.

157 [Munna mmosa onlavula ni Munna Branham—Mol.] Ayo. Kaanithhuna kikhalanne-ene atithi aka vaava ohiy'ula, kaamuwerya ovahererya nivekelo wa yaawo naanaano va. Kinnitthuna wa nyuwo, nave. Kinnisuwela sana.

158 Tithi a Wirimu, mulopwana omuyanre mmirav'ola, ori muumuu mulaponi ohiy'ula mwaha wa yoowo. Nto mwan'awe ontthuna wira atithi awe ehokoloxiwe; iwe ory'aya molumwenkuni w'etampi, onamuhapaliwa. O Pwiya, kinvahererya nivekelo nla ni waamini ni ikuru, nave ni sothene sinwery'aka orihana, ekulukho ela yaamukhaani, ni Nsina na Pwiya Yesu. Miyo kinrihela ni pharancikula wa xetwani ule ohenle etthu ile ottottiwa iwe. Ni wira ekhume. Ni wira owo ahokolowele munikotoni ni voolipa-vo, mwa Nsina na Yesu. Amen.

159 [Munna mmosa oniira, “Mukivekelele, Munna Branham, wira kikhalanne Eroho Yowarya. Kintthuna kaakhele Eroho Yowarya. Kihaana waakhela. Kinnitthuna. Kihaana waakhela Eroho Yowarya.”] Muntthuna mwaakhele Yeeyo. Muntthuna murwe mmuttettheni memmo muri anatiri othene. [“Ayo.”]

160 Nto vano, Pwiya, mmirav'ola ori epannte ekina ya muro, ooteka muxax'awe epannte ekina, nto Yordani onootekhuma. Ni khiivo enamuna ya owo olapuwa muhikhanle Nyuwo opaka ephiro ntoko saamwiirenly'anyu Yoxuwa ni Isarayeli. Nto, Tithi, kinoovekelani Nyuwo, ntoko murumeyi Anyu, mmuhiye munn'ihu ooreerexa, O Muluku, mmuhiye akele Muttetth'ola

wa natiri, natiri ula. Wira, epantte ekina, ntoko saakuxiw'aka ohiyu umosa, kikkhalane oreeriwa w'omuvara ni ompweherya miyoono saka yoola, Muttetth'ole mukina, kiiraka, "Munn'aka ooreerexa." Munivahe, Pwiya. Wira owo amwaakhele natiri a Muluku, Eroho Yowarya. Amen.

¹⁶¹ O Pwiya, wa yoola, munn'aka oophenteya; ntata nla ninkhalaka n'okireerela murima, ni nookiirela itthu, soohihimmwa. Owo onnaamini ni ookhalana waamini. Nto vano nwanani oneererya omukuxa ola, mpatthani aka; esukhari; ni owo onuupuwela wira owo—owo onoowerya omukuxa mmirav'ola. Masi miyo kinoomurweela. Miyo kinoorwa, wira kimuhokoloxe ole Awinyu, Pwiya, kirihaka nluku nla ni waamini onluluwanya. Mwa Nsina na Yesu Kristu kinnimmana tiyapeeti ule a esukhari!...?...munn'aka. Muhokoloxerye epwittipwitthi Anyu munikotoni, Tithi, mwa Nsina na Yesu. Amen.

[Munna Bell muthiyana onlavula ni Munna Branham—Mol.]

¹⁶² O Pwiya, munn'ihu onnisuwela wira orilela nno wookhala, siiso tothoro onihimy'awe, etthu eniwiivani. "Khula eliivura, orilela, entthuneya eyaakha ntero," ntoko ethoonyeryo ya mahiku ya sekuuru. Vano owo onttthuna akhale mukumi wira amuttittimihe ni anvuwihe Muluku. Ni khaavo hata tothoro onwerya wira yeela, Muluku Tithi. Eyo paahi eri mma—mmatatani mw'Awnyu. Nto Munna Bell onnikhalaka ooromeleya sana. Ni onnikhalaka ooreera murima ni ocaliwa moweereriwani, onivir'awe-mo. Owo oovira moweereriwani munci-ene moowiixa. Miyo kinoomurweela ohiy'ula, Pwiya. Kinorwa okumanana nwanani ule. Kimmunina ni voolikana kinwery'aka-no. Mwa Nsina na Yesu Kristu kimmurihelela nluku nle na waamini nwanani omuvanre. Nlo nimmwarye, ni atthyawe arowaka ottaiwene wa owo, vano owo onoowerya ohokoloxeriwa mminyepuni sa muuttutthi ni mikithi ni maasi oomaleleya, mwa Yesu Kristu. Amen.

Enookhala, Munna Bell. Muhihoverye tu.

¹⁶³ Munna Spencer. [Munna Spencer muthiyana oniira, "Munna, Munna Bill, miyo kinnaaphenta Apwiya vooreerexa khula nihiku onkhal'aka. Ni kinoorwa va iyaakha miloko miili, nipuro nla. Ni kinnivonihiwaka itthu sothene simphiyererya okikattiyamiha. Nyuwo munnuupuwela sothene, ni...?..."]—Mol.] Vekeekhai kinnuupuwela, munna...?...["Ni Awo annikireeriha vanci-ene! Ni miyo kinnaaphenta Awo sana, khula nihiku n'ekumi aka. Koosuwela wira kirina makhalelo ooreerexa mw'Apwiya."] Miyo kinnaamini iyo, Munna Spencer. ["Kootteliwa murima. Kootteeliwa murima! Ela yaahikhale Eroho Yowarya erin'aka, miyo—miyo nlelo kiri waltari mwaha wa itthu sothene Awo arin'aya wira ekivahe. Nto kinrowa okhwa waltari."] Amen. ["Ti vaavo kaatthun'aka muheya wa

mukhora, w'okhwa waltari ni Yesu.”] Amen. Muluku, munvahe. Amen. [“Ni kinimooleelani etthu entthun’aka wira mwiire. Nto kirowaka, kihaakuxa amusi othene ni miyo. Masi kintthuna wira amusi aka othene, moosuwela.”] Kinniiwa. [“Kintthuna wira ale kinaaphent’aka yoopowe.”] An’inyu. Ti yeeyo. [“Ni an’aka.”] Ayo, muhano. [“Ni etthoko aka.”] Ayo, mulopwana. Miyo koosuwela. [“Kinnoona wira othene aya ari sana.”] Ayo. [“Nyuwu moonivekelela.”]

164 Hiyo othene ninnimusuwela Munna Spencer, ni ninnisuwela moota Munn’awe Jess aakhanly’awe voolipa murima, masi vaavo wookhala orwa okereja nno. Kalapuwelaru epantte ekina, awo khanrowa weettasa pure-pure siisa. Awo anrowa okhalasa amiravo. Oh! Munna Jess, vakhala wira miyo paahi...?... moosuwela. Vano nto nyuwu othene moosuwela moota, paahi—epantt’ile yaamukhaani paahi...?...iwe, munthikela-tho okhala mwaaruusi ule oophenteya, nto Munna Jess okhala mwammiravo. Muluku ohoolaheryani.

165 Vano, nkawehani. Kintthuna koovaheni mwiixuttiho mwaamukhaani paahi, okhalaka wira nyuwu ti mukisenrye va, kintthuna kivahe.

166 Okhala wira, koosuwela wira ola ti mwammiravo anyu, Charlie. Munthuna wira avekeleliwe? [Munna Charlie oniira, “Ayo.”—Mol.]

167 Kintthuna kihimye etthu ila emosa. Mootoko osoma mwa Yoolempwa vaavo Bibilia ohimmy’awe yeela? Paulo aahimuhimeerya Mukhulupale a anakhotto emiya muRooma.

Munniwerya okiiwa sana? [Muthukumano oniira, “Amen.”—Mol.]

168 Aahimuhimeerya muRooma, okathi aamupurunly’awe xoowa awe, wira aisiive, oFilipo okathi waary’awe mukhatteya. Vano etetere y’elapo khuttikinya ekhatteya. Owo khwira, “Mmwaamini Pwiya Yesu Kristu, nto nyuwu n’etthoko anyu munimoopowa.” Mootoko wiiwa yeeyo? [Mthukumano niira, “Amen.”—Mol.] “Nyuwu n’etthoko anyu.” [“Amen.”] Vano, nkawehani. Mwakhalana waamini woophiyerya woopowa mmansinyu, khamunwerya okhalana-tho waamini woophiyerya etthoko anyu? [“Amen.”] Muluku, mwa enamuna emosa, onimwiira.

169 Nto, Pwiya, kinivekelela Munna Spencer muthiyana ni Munna Spencer mulopwana, ohiy’ula, wira khula mwaana, awo ni an’aya, othene ekhale Muttetth’ole, woovuwa ni wootteeliha murima iwe weiwo ohinrowa okhala-wo hata eretta nnakhala wuuluvala, hata muxankiho wala ovirikaniwa, nto ekumi ila yothene yaamukhaani nno enoomalamala ntoko ettoora evinre. Awo yaakhele yeela, ni an’awe othene, ni aiy’awe, oophentiw’awe othene, n’ale othene animphenta, ekhale weiwo ni yoowo, mwa Nsina na Yesu. Amen.

¹⁷⁰ [Munna Spencer muthiyana oniira, “Amen. Kooxukhuru.”—Mol.] Muluku ooreeriheni. [“Kinoophiya iyaakha miloko mithanu na miraru ni piili, naanaanoxa.”] Iyaakha miloko mithanu na miraru ni piili. [“...?...Masi awo anoomalamala, ni munnuwel’owo. Masi nlelo kinnaapeya itthu saka sothene, okattha, ni opasari, ni otthokiha etthoko.”] Vekeekahi ntoko olumwenku onimoramor’aya vakhani-vakhani, Munna Spencer. [“Ayo, ti yeeyo. Nkinreere okhulumuwa, okathi wothene. Awo ankuxa eyo...Kaahaakoha ame aka, ame aka ookiphwanya, yaarino iyaakha miloko mithanu na mixexe, moota mutthu onoonaawe uuluvala vale, okathi ovinre khalayi. Awo yiirale, ‘Rose, khino nyuwo munrowa okhulumuwa okathi wothene.’ Kookhulumuwa.”] Ahe, nyuwo moolikana tu wira murowe mwamumule, moone. [“Nkinreere okhulumuwa, okathi wothene. Kintthuna omumula. Kinnitthuna yeeyo.”] Ayo, muhano. [“Nto kintthuna kimumule mw’Apwiya, mmakuthani mwaka. Khula, sothene kintthun’aka.”] Ayo. Muhele waamini wanyu mwa Yaawo paahi, Munna Spencer, nto munoolapuwa. [“Kintthuna kikhwe waltari, mwa Nsina na Yesu. Ti yoowo kaarow’aka otthuna omoona, mpakha Owo otthikela iihanaka.”] Ni Owo iirale... [“Kintthuna sothene Owo orin’awe sa miyo.”] Nto vekeekhai ntoko seemenly’aka va siisa ni nyuwo, ohiy’ula, Munna Spencer, ni mahala Awe kinoowoonani nyuwo ni Jess epantte ekina ya mukaano iwe, mury’ene mmiravo ni mukumi. Othene anyu munrowa otthyawaka, munyakulaka, “Munn’aka! Munn’aka!” [“Ayo.”] Kinoowoonani.

Onanariwa wawe.

¹⁷¹ Muluku Tithi, mwali ula aari oolula ikuru, nto owo ori ottaiwene wa ophiyerya wa murette. Ori owo paahi, etthu enikhottiha. Masi miyo kinoomurweela ohiy’ula. Kinoorwa wa Nyuwo, Tithi. Kinoorwa, koovekelakani Nyuwo wira mulukamihe eyoopelo entthuneya miyo oriha, epatte mooro. Wira eluluwanye voolikana-ene, ehupa ottuli wawe. Wira mavekelo ala, mwa Nsina na Yesu Kristu, emane enanareliwo eyo ni ekhere kapatti-kapatti, ehokoloxe epwittipwitthi ila mmunypuni mwa Muluku. Amen.

Ehaana okhala, oophentiwa.

¹⁷² [Munna mmosa muthiyana oniira, “Nvekele paahi. Kookhalana aana athanu na mosa kininkekel’aka Muluku wira aavonihe ni awoopole.”—Mol.]

¹⁷³ Muluku a Wirimu, munvahe yeeyo, an’awe athanu na mosa owo onttun’awe wira yoopowe. Owo ohiiwa onamoon’ole wa Munna Daulton, an’awe axithiyana oophenteya. Owo onaatthuna an’awe athanu na mosa, Tithi. Owo okhalane yaawo. Awo emphwanye Muttetth’ole weiwo ohikhanle ohiyu, ookhapeleliwa ni oosukiwa voolipa-vo ni Ephome ya Yesu Kristu. Amen.

Nwaakhele, munna, ovekela waka.

[Munna mmosa muthiyana onlavula ni Munna Branham—Mol.]

¹⁷⁴ Kinniwaaminini. Khiivo hat'etthu, voorika, enwerya okhaliherya. Awo anaavaha etthu yaamukhaani enkhala ntoko, oh, etthu ntoko asetamiina. Owo kortisoona, awo animwiihana siiso. Owo, owo onoowiivani, onohalela. Owo onhonona ephome anyu siiso. Masi, nkawehani. Moone, wiipa makhonyokhonyo onikhala ntoko kharamu ovanre epwittipwitthi khunatthyawa arowaka ottaiwene. Vano, pharancikula onrowa wira exeeni? Oh, wulu! Ookhala kharamu muulupale, onikhuluma ni mwaapwittipwitthi. Ni owo omusivela mwaapwittipwitthi, tivo owo ootthyawa ni mwaapwittipwitthi. Masi Davidi aamukunxe pharancikula khimutthimakela. Munnona? Vano nwehe. Owo aarina maluku mathanu: w-a-a-m-i-n-i, mwaneene, m-w-a. Pharancikul'awe aari mmatatani *mu*: Y-e-s-u. Owo ohoopeliwa ohookhwa. Ehaana wiiraneya etthu. Nrowe noomole wiipa iwo wa makhonyokhonyo, ohiy'ula, ni nivekelo nla. Muluku oovaheni.

¹⁷⁵ [Munna mmosa muthiyana onlavula ni Munna Branham—Mol.] Owo onthuna opatisiwa ni Nsina? ["Nnari. Nnari. Kahi yeeyo ohimmy'awe."] Munthuna wira apatisiwe. ["T'utthuna waka wira owo apatisiwe."] Kooxukhuru, munna. Kahi mwaha wo wira eyo t'inamuna. Okhala wira . . . Vano, vaakhanle wira yaari mBibiliani, maana, "Tithi, Mwaana, ni Eroho Yowarya," miyo—miyo kaamwaamini yeeyo, kaamukhala kivarenle-ene yeeyo, munna. Nka—nkaarowa otthuna okhala oovirikana. Miyo—miyo kaamutthuna yeeyo. Nkaarowa ohiya . . . miyo—miyo kinoorowa waakhula mwaha wa yeeyo, moone. Nto kihaana ohimya siiso ntoko *Eyo* enihimy'aya; kahi wira kivirikane, masi wira kikhale naxariya.

¹⁷⁶ Vano, Tithi, hiyo nnaarweela oophentiwa awe. Orina wiipiwa makhonyokhonyo, ni va owo onthuna wira ole apatisiwe ni Nsina na Pwiya Yesu, okhala wira eyo t'ivolowelo. Owo ti mukhora woohuliwa. Ti vaavo Yoxuwa aatthukunly'awe ephiro yaalapuwa mpakha muttethe wa natiri. Khiyaari mapuro maili wala mararu yaatthukuliwe; naari nimos a paahi.

¹⁷⁷ Petru, Nihiku na Pentekosite, okathi Ekereja yaapaceny'aya olipuliwa, aahitthukula ephiro, khwira, "Murukunxe murima khula mmosa a nyuwo mpatisiwe ni Nsina na Yesu Kristu." Khonahimyeke wira awo avirikanyihe ephiro ene yeeyo, khula mmosa aahilapuwela Muttethe wa natiri.

¹⁷⁸ Akina w'awo yaatthuna olapuwa, eviraka nipuro nikina noohiixa, nto Paulo khimuleela, "Mpatisiwe mwa xeeni? Munthuna olapuwa vayi?"

Nto awo khwira, "Ohitto nno weiwo Yohani aawehaawe."

179 Owo khwira, “Ahe, Yohani aathonya okathi paahi, ni nipuro.” Vano nto awo vaiwaly’aya yeela, awo yaahipatisiwa nipuro nooloka. Vano awo khurowa, khwaakhela Eroho Yowarya, vaareera.

180 Munvahe yeeyo munn’ihu n’ale oophentiwa awe, mwa Nsina na Yesu Kristu. Amen.

181 Munna Lyle. [Munna Lyle oniira, “Kinnaamini wira nyuwo mwa mukhulupale oothuneya sana, Munna Branham.”—Mol.] Oh, munna! [“Eentte...?....Munnuupuwela wakhala moolohani, yaahirwa etthu...?....Mwahimya vale yooloha ene, vaareera. Ti yeeyo kaarin’aka. Vaavo, nyuwo munniloa sana okathi wothene!...?....”] Ayo. Owo okathi vakhani. [“Ayo.”] Ayo. Kootteeliwa murima...?....Muluku ooreeriheni. Nyuwo muri mphironi murowaka Muttethe wa natiri vano! Khino kinoohimya yeeyo.

182 Akavi anuupuwlea okathi vakhani kihinatthi olipiheriwa mutek’ola, nto miyo kimiseryaka ni mulopwana mmosa nihiku nimoso, ohitto omuratthini, onthiyani? Nto miyo kaavara ihopa sikhaani, nto Eroho Yowarya khukirweela. Yaahikhala e... Mulopwan’ola Namoono a Yehova, aari. Munn’awe ori vaava nipuro nlo, Banks Wood. Owo ori vaava nipuro nlo, yoowo okhanle namaithoko aka.

183 Ola ti Lyle. Nto atthu ala yaari Anamoono a Yehova. Nto awo yirale, nihiku nimoso okathi waamisery’ahu ohitto iwe, mmirav’ola vaamanly’awe orukunxa murima, kaahimuleela wira yaahikhala etthu emosa mwa makhalelo awe, ni etthu—etthu yiraneiyee, ni yothene. Yeeyo, omanly’awe okileela vano, ni owo onoomalaru okhalana yeeyo mwa makhalelo awe, eyo ekeekhaii, enakhaleru etthu p’itthu yaari. Vekeekhaii eyo ekhweelii. Atithi awe ti yaari na—namasoma. Apaapa ari vaava ohiy’ula, Billy? [Ookhala oniira, “Nkisuwenle.”—Mol.] Nto owo ni mwaar’awe, oowaili, aapatisiwa, wira ekhaleleke onamoono mwa Nsina na Yesu Kristu, va mutankini. Nto mulopwan’ola aakilanthe vakhiviru ni miyo, nihiku nimoso.

184 Banks, muri vayi? Ori vaava ohiy’ula? [Ookhla oniira, “Ottuli iwe vanlothoni ottuli iwe.”—Mol.] Ottui vanlothoni. Ayo.

185 Nto hiyo naammiserya. Nto, munna, mwammiravo aka aahiiva...miyo kuupuwela wira aamwiivale paakha mwaamukhaani, mahiku vakhani yaavinre. Paakha ole mai aarina nikhuru n’apaakha axikhaani, vano owo khimukuxa khimuriha. Miyo kuupuwela...miyo khwira, “Apwiya anoorowa ohihimuxa ekumi yaamukhaani,” nsana naya. Ti yeeyo, Lyle? [Munna Lyle Wood oniira, “Ayo.”—Mol.] Kaakilanthe vanikhukuni. Nto miyo khwira, “Eyo ti SIISO ANIHIMYA T’APWIYA.” Nto hiyo naahimiserya ohiyu wothene khuhivar’etthu.

186 Voosiisu aya, naammiserya, ottuli vanikhukuni naamukhaani, wira nivare ihopa kamosa-kamosa. Eyo ehopa yaamukhaani. Nto Munna Lyle aahikhalana ekopo yuulupale, vano khuhiya ehopa yaamukhaani omirya, nimeso nuulupale owo aarin'awe, mpakha, okathi okumihenry'awe ota, mukhoyi wothene waari vathi, nimeso nuulupale, mmirimani mw'ehopa yaamukhaani. Nto okathi owo okumihenry'awe ota, owo aahaana opurula marupo paahi ni itthu sothene sikina ota wa nikhupa naamukhaani, wira ovare. Nto khipurulela ota yothene, 'okhala wira nimeso nuulupale naahiphara vathi mmirimani mw'ehopa yaamukhaani. Nto vairaly'awe siiso, khurihela mmaasini. Nto owo khuthukumela, vaara vaxexe wala vathanu, nto yaari yeeyo, okhala wira marupo aya ni malakhalakha aya saari vate v'eyano aya. Nto khuttelema vale ewoora yoophiya emosa, khuttelema erowaka mutakhwani.

187 Nto miyo kaakilanthe vale, kimiseryaka. Nto naanaanoru, Eroho Yowarya khurwa, khwira, "Mulavule n'ihop'eyo."

188 Miyo khwira, "Ehopa yaamukhaani, Yesu Kristu onnoovahani-tho ekumi anyu." Nto ehop'ele yaamukhaani, eryeene yookhwa mmaasini, khurukunuwela mpararini mwaya, khwiira rrrroot, khurwa mmaasini, vowaakuveya ntoko saawery'aya orowa.

189 Munna Lyle ni Munna Wood jaarisa vaavo. Munna Lyle khwira, "Munna Branham, eyo yaakihimya miyo, okhala wira kaahihimeerya ekhaani. . .

190 [Munna Branham onlavula ni Lyle Wood—Mol.] Ohiy'ula, kaaleeleke etthu mwaahimmy'anyu? [Munna Lyle Wood oniira, "Mwaaleeleke. Vaareera, Munna Branham."]

191 Owo ohimye wira, okathi opurunly'awe marupo mwa yeeyo, aaroorihela ota iwe, khwira, "Muhoopela ecupu anyu yookiserya, mwaamukhaani," ntoko siiso pahi. Khurihela.

Owo khwira, "Eyo—eyo yaakihimya miyo."

Nto miyo khwira, "Nnari, Munna Lyle. Khayaari yeeyo."

192 Munna Banks ottuli iwe, khwira, "Atthu akavi molumwenkuni mu, ikonto kavi, waarowa waasivela okhala vatthu nikhanly'ahu naanaano va, wira yoone owerya wa Muluku okhuruwa khupaka etthu siisaale!" Mwa moolumo makna, owo ntoko. . .

193 Kookupali wira hiyo othene noonale ntoko Petru oonaly'awe, "Vannireerela okhala vaava. Nrowe niteke mixaxa miraru." Munnona? Ti yeeyo.

194 Vano, Munna Lyle, mooreerihwa ni Eroho Yowarya vano. Mookhuma wEjitu. Miyaapu s'ayu ni soonanara sa molumwenkuni moohiya ottuli. Mweemenle ohitto mukerekhere wa Yordani vano, munihalela oplapuwela okhopela. Muluku ookuxeni oorihakani; Lyle.

¹⁹⁵ Muluku Oowerya sothene, va eri etthuvo Anyu. Vekeekhai owo aari mooxankani mootepa, Pwiya, masi murim'aka khimurowela. Mavekelo ahu khumana nikuma nooriyrya vale, nto etthu ene yeeyo yaamuvarelela yoomukhuma. Yoonyaanyiwa. Nto vano owo onimweetta akhuruwelaka oYordani. [Munna Lyle Wood oniira, "Kooxukhuru, Yesu."—Mol.] Mmukuxe mmuroihe Muttethe wa natiri, Pwiya. ["Ayo, Pwiya."] Mmutthitte eriyari y'atthu. ["Ayo, Pwiya."] Wira, Nihiku nle noovuwa nakumana weiwe, koone opatikha wa miyoono sawe, akhuwelaka, "Munn'aka ooreerexa!" ["Amen."] "Miyo kinnimusuwela." Mmuruuhe Banks ni yoowo, Pwiya, munoomuruuha; paapa ni maama, ni othene aya, murokora, ni emusi yothene yuulupale? Hiyo othene nikumane weiwe, Pwiya, ni khula mmosa a yaawo esareye Eroho Yowarya. Miyo kinvekela mwa Nsina na Yesu. Amen. ["Amen."]

Munimwaakhela Eyo, munna. Muluku ooreeriheni, Munna Lyle.

¹⁹⁶ [Ookhala oniira, "Munna?"—Mol.] Ayo, munna. ["Wookhala olikari okhumme ottaiwene, ni okhwa, onwehererya mooraamini."]

¹⁹⁷ Ookhala mutthu onookhwa, mooraamini ottaiwene. Nto kinvaheererya muteko wa Munna Neville oryeene memme.

¹⁹⁸ [Munna Neville oniira, "Nihiku nuulupale ni nooreerexa mw'Apwiya! Muluku ooniirela itthu soothamaleya olelo. Soowehererya saka soomaliheriwa voomalela—Mol.]

["Nrowe nivenye vamosa, neemele.]

¹⁹⁹ ["Muupuwele muteko nto, Namararu ohiyu. Mukhale nvekelaka vanci-ene. Othene oohikhala sana, mirima soohisuwanyeya sikhale soomukwannya Muluku. 'Okathi ori vakhiviru. Ola p'ukathi. Olelo ti nihiku no woopowa.']

²⁰⁰ ["Muluku amureerihe khula mmosa a nyuwo aletto, nyuwo atthu munikhuma ottaiwene. Mavekelo ahu ti, wira, Muluku oovaheni mikwaha voomoreliwa ikharari, mutthikelaka mapuro munikh'al'anyu. Vaahireera okhala ni hiyo. Nto munivekelele mwaarowaka, wira Apwiya areerihe nipuro nla, nave.]

²⁰¹ ["Tith'ihu a Wirimu, ntoko murumeyi Anyu sirwiiy'awe ohiy'ula, wira ovare muteko wa muteko wa murumeyi Anyu ni profeta, eemenle-ene eriyari n'eriyari, ephaka, apakaka ekhottiheryo, murwaaka wa hiyo ni ephentelo yoovihaha murima ya murumeyi Anyu, ntoko sipatisiw'awe ni Eroho Yowarya, khuvahiwa muteko wa profeta, wira alavule ni nloko nla. Munikhaliherye olelo ni ohiy'ula, wira naakhele Mutthaka onrwa wa hiyo, Pwiya, muleeliheryo, wira nikhale oolikana.]

²⁰² ["Mmureerihe khula mmosa ni othene ankhuma mikhora s'emp'ela ohiy'ula. Eretta eri mwa hiyo, nihinsuwel'ahu hat'etthu ya yeeyo, mahala Anyu ooreerihwa ni owerya

anaakiherye ni anikhapelele ni anivonihe, ni anisuke, mpakha okathi yoole Nyuwo onrow'anyu olikana wira munithamiherye epantte ekina. Mwaareerihe othene ale oowoceya ni oovirikanyiwa, oowoova, n'ale ari ootteettheya.]

203 ["Muluku, hiyo ninvekela ohiy'ula othotoliwa w'omeekh'aya, mureeriho wa Eroho Yowarya, wira okhale mwa khula namweetta, khula nawetta, khula muletto vapuwani vahu. Khula mmosa onkhuma vamukhora ohiy'ula, okhuneela iwe w'ekuwo ya Ephome, ya vamwiikimanyo w'oKalvario, ekhuneele ni evaherye voophiyerya.]

204 ["Munivonihe okathi onwereiw'ahu. Munisuke ni ikuru Sanyu soowerya. Munireerihele muteko. Munihiye neetteke mwa ophenta, ohoolo Wanyu, mahiku othene a ekumi ahu. Nto hiyo nnimoovuwihani mwaha wa yeela, vano hiyo ninvekela mwa Nsina na Yesu Kristu ni mwaha wa Yoowo. Amen.]

205 ["Nto Muluku ooreeriheni. Ni nootteeliwa murima okhala ni nyuwo. Nvahane mukhono mmosa ni mukhw'awe."]

206 [Munna Branham onthikela vaplataforma muthukumano ovahanaka mukhono n'ukhomasana mmosa ni mukhw'awe ekhumaka.]

207 [Munna Branham onlavula ni mutthu.] Vekeekhai sinnikisivela sothene munikiirel'anyu, epaphelo ni...?...Ayo, mulopwana. Vekeekhai sinnikisivela...?...


208 [Munna Branham onlavula ni Munna Neville—Mol.] Vano hiyo nooveleela nluku na waamini...?...Aahikhala mulopwana mmosa a mmuttettheni...?...Vano miyo khimuveleeliherya mavekelo, mwa Nsina na Yesu Kristu. Ory'ene vale ewoora ntero, hata ommana murima, hata omumula, hat'etthu. Hata omumula, hata ommana murima, wala omumula, hat'etthu; maitho awe akenle-ene mmuruni mwawe, khumorela vapulpitu. [Munna Neville oniira, "Owo aamuhin'ye vaavale mpakha mavekelo ale orwa."]

209 *Ola* ti wootthukuliwa nlelo? [Munna Neville oniira, "Ayo, ti wootthukuliwa nlelo," ahimiyaka wira mikrofoone ti sootthukuliwa nlelo—Mol.]

210 Vanniweryaneya okiwiriyana? Osulu iwe, namalaleya ehapari mmosa mmiravo, mulaleyi, oIndiana nno, aamulaleya, khumora khukhwa vapulpitu, khuvira ewoora yoophiyaka emosa naanaano. Okathi waalaley'awe, khumorela ni wiitho, nto khukhwa vapulpitu, namalaleya ehapari oosuwanyeya, alaleyaka oIndiana nno. Pastore khurwa khukiihana. Owo okhwiye alaleyaka ori ooreerihwa ni Eroho, aamonre ni wiitho, maitho awe khukelamo, omumula wawe khimuhiya. Onihimmwa wira ohookhwa, opwehiwe ookhwa ene yoovira ewoora. Nto etthu emosa khwaaleela wira yiianiwe ekereja wira ekileele kivekele. Vano miyo koovahererya mavekelo wira ahokoloxiwe, mwa Nsina na Pwiya Yesu. Mutakaihane ni miyo

mwa waamini, wira ehivonye exeko ene; emuvahe ikuru ni emuhokoloxe. Kooxukhuru.

²¹¹ Muluku akhale ni nyuwo, mpakha kiwooneni Namararu ohiyu. Nyuwo atthu a oGeorgia ni mapuro makina, kwaherini. Muluku akhale ni nyuwo.

²¹² [Munna Branham onikhuma vamikrofoni n'ulavula n'akina, masi ovaanela waya khuniiwanyeya—Mol.] 

OKHALIHIWA AANA 1 EMK60-0515E

(Adoption 1)

ETTHARANELO YA MITTHAKA OKHALIHIWA AANA

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku ohiyu, mahiku yettaka 15 mweri wa Maio, 1960, oBranham Tabernacle oJeffersonville, Indiana, w'Amerika, okuxiwe wookaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org